

तब अपनो संसार ते, गुनै उद्धार प्रपन्न ॥ ६४ ॥
 पैसठयों भगवान की, मूरति गुनै पषान ॥
 ताको सति करि जानिये, यह पाषाण महान ॥ ६५ ॥
 छाछठयों गुरु देव को, गुनै जो मनुज समान ॥
 महापातकी ताहि को, भाषत वेद पुरान ॥ ६६ ॥
 सरसठयों जो संत में, राखै जाति विभेद ॥
 सो पावतहै नरक में, कोटि वर्ष लों खेद ॥ ६७ ॥
 अरसठयों कलिमल हरण, हरिचरणामृत काहिं ॥
 साधुचरण जल जल गुनै, तेहि उद्धारहै नाहिं ॥ ६८ ॥
 उनहत्तरयों कृष्णके, अहैं जे नाम अनंत ॥
 और शब्द सम तेहि गुनै, सो न नरक निकसंत ॥ ६९ ॥
 सत्तरयों हरि को गुनै, औरन देव समान ॥
 सो पापी यमराजपुर, पावत दंड महान ॥ ७० ॥
 इकहत्तरयों कृष्णके, पूजन ते मतिवान ॥
 अधिक संत पूजन गुनै, ऐसो वेद प्रमान ॥ ७१ ॥
 बहत्तरों श्रोता सुनो, उभय भांति सब कोय ॥
 कृष्णचरण जल ते अधिक, साधु चरण जल होय ॥ ७२ ॥
 यदुपति के अपराध ते, अधिक साधु अपचार ॥
 हरि अपराध मिटै कबहुँ, मिटै न सो युग चार ॥ ७३ ॥

धर्म बहत्तर यह परधाना । दायक सकल अवशिनिर्वाना ॥
 येइ बहत्तर धर्म जोकरई । तासु नाम सज्जन जग धरई ॥
 कीन्हें विना बहत्तर धर्मा । वृथा होत सिगरे सत्कर्मा ॥
 यह सर्वस संतन को जानो । मुख्यसंतको धर्महि मानो ॥
 और करै वा करै न कोई । पै जो निरत बहत्तरहोई ॥
 सो पूरो जग संत कहावै । जियत मोद अंतहि गति पावै ॥

नै जे कही बहत्तर रीती । संत होहु तो करहु प्रतीती ॥
संतरासेक सुशील मतिवंता । जे अनोख प्यारे भगवंता ॥
ते सब करें बहत्तर रीती । इतने अहैं संतकी रीती ॥
इतनोई कर्त्तव्य संतको । मिलन होत रुक्मिणीकंतको ॥
वेद पुराण शास्त्र कर सारा । रामानुज यह कियो उचारा ॥
सरल रीति भाषा सो गाई । याके करत न कछु कठिनाई ॥

दोहा—तन मन धन जो संतको, मानि करै सत्कार ।

ताहि आपते मिलतहैं, श्रीवसुदेवकुमार ॥ २२ ॥

यहि विधि जब किय गुरु उपदेशा । तब जेशिष्य रहे तेहिंदेशा ॥
ते तब अचरज गुने प्रवीना । कस गुरु उपदेश्यो जन पीना ॥
पूछे सकल शिष्य कर जोरी । कास्वामी मनकी गति तोरी ॥
तब यतिराज कह्यो मुसकाई । मोहिं बखस्यो विकुंठ यदुराई ॥
बीते आजसहित दिन चारी । मैं जैहों विकुंठ पगुधारी ॥
सुनत शिष्य सब भये विहाला । मरण ठीक दीन्हो तेहिंकाला ॥
तब बोले रामानुज वानी । तजहु शिष्य यह वृथा गलानी ॥
पूर्वाचार्य गये हरि धामा । पंचभूत तन को यह कामा ॥
शिष्य कहे नहिं सहव वियोगा । धीरज होय सो करहु नियोगा ॥
तब रामानुज अपने रूपा । बनवायो अनुरूप अनूपा ॥
तेहि मिलि शक्ति धर्यो तेहि माहीं ॥ थापित कियो रंगपुर काहीं ॥
दूसरि निज मूरति बनवाई । भूतपूरी महँ दिय पधराई ॥

दोहा—तीसर अपनो रूप रचि, व्यंकट शैल धराय ।

कह्यो सकल शिष्यन करहु, यामें प्रीति महाय ॥ २३ ॥

अबलों मूरति तीनहु थाना । है प्रत्यक्ष प्रभाव महाना ॥
पुनि सब शिष्य विनय अस कीन्हे । केहि विधि रहवाई शचित दीन्हे ॥
यतिपति कह जेहि विधि हरि राखै । तेहि विधि रह्यो मुक्ति अभिलाखै ॥

कियो उपाय न परगति हेतू । तनु अधीन यह कृपानिकेतू ॥
 पूर्वाचारज रचित प्रबंधा । पढ़ेहु पढ़ायहु करि सम्बधा ॥
 मंत्रराज नित जपेहु सुजाना । याते गति उपाय नहि आना ॥
 और सुनहु इक परम उपाई । जाके किये सकल बनिजाई ॥
 रसिक विज्ञ वैष्णव शुभ शीला । अहमित रहित निरत हरिलीला
 तिनको शासन शिरपर धरिये । तिनसों हरिसों भेद न करिये ॥
 यह जानहु तुम परम उपाई । यह श्लोक दियो हम गाई ॥
 श्लोक—श्रीभाष्य द्रविडागमप्रवचनं श्रीशस्थलेष्वन्वहं ॥

कैङ्कर्यं यदुशैलनित्यवसतिःसार्थद्वयोच्चारणम् ॥

यद्वाभागवताभिमानमननं श्रेयःसतामित्यलं ।

शिष्यान्प्राहयतीश्वरःपरमगाद्विष्णोःपदंशाश्वतम् ॥

विषय भोग द्वै भांति समूला । एक विरोधी इक अनुकूला ॥
 तजै समूल विरोधिन काहीं । प्रीति करे अनुकूलनमाहीं ॥

दोहा—हरि अनुरागी लोभ हत, जेहैं संत सुजान ।

तिनको संग किये सदा, लहत अवशि निर्वाण ॥२४॥
 यहि विधि शिष्यन करि उपदेशा । बोलि पराशर को तेहि देशा
 कर गहि रंगनाथ ढिग गयऊ । हाथ जोरि बोलत अस भयऊ ॥
 देहु प्रसाद पराशर काहीं । पूजक सकल तेहि क्षणमाहीं ॥
 हुत प्रसाद पादुका लै आये । सुखित पराशर शीश धराये ॥
 रंगनाथ आगे अह्लादी । दियो पराशरको निज गादी ॥
 सौंप्यो सकल वैष्णवन काहीं । राख्यो प्रीति यथा मोहिं माहीं
 पकरि पराशर कर धर आये । शिष्य गणन यह वचन सुनाये ॥
 मम वियोग वश तजहु न देहू । मोरि शपथ राखेउ धरि नेहू ॥
 जब वैकुंठ भवन दिन आयो । तब सब शिष्यन बहुरि बोलायो ॥
 कइयो आजु भोजन करि लेहू । सुचित होहु तजि मन संदेहू ॥

रंगनाथ पूजकन हँकारी । तिनको सबसंदेह निवारी ॥
पुनि आंगनमहँविरचिकुशासन । धरिनिजशिरगोविंदपद्मासन ॥
दोहा—आंध्रपूर्ण के अंक में, धरचो चरण यतिराज ।

वेद पढ़न लागे सबै, चहुँ दिशि साधु समाज ॥ २५ ॥
बाजा बाजन लगे सुहावन । जय हरिजय हरि दिशि ध्वनि छावन ॥
महापूर्ण पादुक धरि आगे । ध्यावत यामुन पद अनुरागे ॥
माघ शुक्ल दशमी शनिवारा । मध्य दिवस यतिराज उदारा ॥
ब्रह्म रंघ्र है यतिगण स्वामी । गे विकुंठ जहँ अंतर्यामी ॥
लिखे चित्र सम जन सब ठाढ़े । सबके उर दुख वारिधि बाढ़े ॥
दाशरथी कुरकेश्वर गोविंद । आन्ध्रपूर्ण ये चारि शास्त्रविदा ॥
अंतिम क्रिया करी गुरु केरी । कुरकेश्वर सब भांति निवेरी ॥
दुसह विरह गोविंद कछु कालै । हरि मत थापि गये हरि आलै ॥
भये पराशर महा प्रभाऊ । हरि पद सेवक जस यतिराऊ ॥
गीता भाष्य वेदार्थहु संग्रह । अरु वेदान्त प्रदीप ग्रंथ कहँ ॥
अरु श्रीभाष्यो वेदान्तहुसारा । गद्य त्रय प्रपत्ति परकारा ॥
ये षट् ग्रंथ पराशर स्वामी । प्रचरित कियो जगत शुभनामी ॥
दोहा—तहँ पंडित कोउ आयकै, कह्यो पराशर काहिं ।

वेदान्ती अस नाम यह, कह बुधवर जग माहिं ॥ २६ ॥
है मायावादी वर सोई । जीति सकै विवाद नहिं कोई ॥
कह्यो पराशर तब तेहि वानी । तेहि देखन मम मतिहुलसानी ॥
गयो विप्र सो तेहि बुध नेरे । कह्यो पराशर जो मुख टेरे ॥
सो कहल्याउँ पराशर बोली । जीतिलेहु गो निज मतखोली ॥
इतै पराशर रंगनाथ सों । विनय कियो युग जोरि हाथ सों ॥
मायावादी जीतन जाऊँ । जो जै कर तुव शासन पाऊँ ॥
रंगनाथ तब करि निज दाया । चमरछत्र तेहि संग पठाया ॥

जाय पराशर विगत विभीती । मायावादी को लिय जीती ॥
 रंगनगर विजयी फिरि आये । भुवमंडल अखंड यश छाये ॥
 रंगनगर वेदान्तिहु आयो । माधवदास नाश सो पायो ॥
 शिष्य पराशर को है गयऊ । अपनी कुमति छोड़ि सोदयऊ ॥
 रंगनगर महँ सो चिरकाला । बसत भयो विज्ञान विशाला ॥

दोहा—चलन चह्यो बैकुंठ को, रच्यो पंच वर ग्रंथ ।

माधवदासैबोलि ठिग, उपदेश्यो सतपंथ ॥ २७ ॥

हमहुँ चहत विकुंठ कहँ जाना । तुम विचरो विहाय अभिमाना
 सहसगीति को अर्थहि शाषा । रचहु विमल तुम द्राविडभाषा ॥
 शिष्य पराशर शिर धरि सोई । माधवदास रह्यो मुद मोई ॥
 माधवदास कह्यो कर जोरी । भक्त चरित सुनिबो मति मोरी ॥
 तबहिँ पराशर वर्णन लागे । श्रोता सकल सुनन अनुरागे ॥
 एक समय गिरिवर कैलासा । भयो गौरिहर व्याह विलासा ॥
 तहाँ जुरे सब सुर मुनि नाना । तहँ कुम्भजमुनिकियोपयाना ॥
 तहँ अगस्त्य सों कह असुरारी । बसहु दिशा दक्षिण तपधारी ॥
 कुम्भज सुरगण शासन मानी । बस्यो दिशा दक्षिण तप ठानी ॥
 बीते वर्ष सहसदश जबहीं । है प्रसन्न प्रगटे हरि तबहीं ॥
 विविधभांतिमुनिस्तुतिकीन्हों । वरं ब्रूहि श्रीपति कहि दीन्हों ॥
 तब कह घटसंभव यह देशा । होय पुनीत तुम्हार निवेशा ॥

दोहा—हरि कह सिगरे देशते, मोहिँ प्रिय द्राविड देश ।

मैं विचरन करिहों इतै, धरि अवतार हमेश ॥ २८ ॥

जो कोउ द्राविड प्रबंधहि गाई । सो जन अवशि मुक्तहै जाई ॥
 शठकोपादिक महाभागवत । हैंहै जगत मोर थापक मत ॥
 उद्धारण पापी जन नाना । अस कहि भे हरि अंतर्ध्याना ॥
 रंग वैकटादिक क्षेत्रन महँ । प्रगट कृष्णसत कियो वचन कहँ ॥

हरि पार्षद विकुंठ पुर वासी । शठकोपादिक भे सुख रासी ॥
भारतवर्षहि नाशि पखंडा । थाप्यो वैष्णव मतहि अखंडा ॥
हरिकोप्रिय अति द्राविड़ भाखा । संवत वेद शास्त्र श्रुति शाखा ॥
द्राविड़ भाषा संतन काहीं । उचित अवशि पढ़िबो जग माहीं ॥
सहसगीत तामें परिधाना । जो शठकोप कियो निरमाना ॥
माधवदास सुन्यो गुरु वैना तिहि विधि कियो मानि अति चैना
पुनि बोल्यो तहँ माधवदासा । करहु सूरि वृत्तांत प्रकासा ॥
तबहिं पराशर अति सुखछाये । सबआचार्य प्रबंध सुनाये ॥

दोहा—ते सिंगरे इति हासको, संक्षेपहु विस्तार ॥

मैं पूरव वर्णन करचो, निजमतिके अनुसार ॥ २९ ॥
जग भागवत सरिस कोउ नाहीं । यह सिद्धांत पुराणन माहीं ॥
नर सो नारायण अस गायो । सोमैं तुमसों देत सुनायो ॥
कमलाशिव विरंचि अरु शेषा । इतने सब ते साधु विशेषा ॥
मम पूजन ते संतन पूजा । है विशेष सिद्धांत न दूजा ॥
केवल करत संत सेवकाई । मुक्ति मिलति नहिं आन उपाई ॥
नरनारायण सों अस भाषा । संत प्रभाव सुनत अभिलाषा ॥
कहन लगे नारायण गाथा । कहौ सो नाय साधु पद माथा ॥
पूरुब एक भयो द्विज पापी । चोर और चंडाल सुरापी ॥
गो ब्राह्मण गण हन्यो हज़ारन । लागत पंथ पथिक धन हारन ॥
राखे रह्यो सो एक निषादी । कवहुँ न रामकृष्ण मुखवादी ॥
एक समय कौनेहु मग माहीं । लीन्ह्यो लूटि साधु जन काहीं ॥
दुखी साधु सब वचन उचारे । कस अनित्यन शरीर निहारे ॥

दोहा—यह अनित्य तनु हेतु तुम, करहु जगत अनघोर ॥

कोटिन वर्षन नरक ते, नहिं उधार है तोर ॥ ३० ॥

तब पापी बोल्यो अस वाणी । चोरी तजे मरे मम प्राणी ॥

काह खवाऊं मैं सुत नारी । पूजे साधु कौन फल भारी ॥
 तब पापी सों कह सब साधू । यह सागर संसार अगाधू ॥
 मरे जात कोउ संग महँ नार्हीं । है कुटुंब संग जगमार्हीं ॥
 जाई धर्महि संग तिहारे । तिय सुत तजै चिता लगि जारे ॥
 यहि विधि संत कही जब वानी । तब कछु मन सोच्यो अभिमानी ॥
 साधु संग परभाव महाना । उपज्यो पापी हिय महँ ज्ञाना ॥
 तब बोल्यो दोऊ कर जोरी । क्षमहु संत यह मम बाढ़ि खोरी ॥
 देहु उधार उपाय बताई । त्राहित्राहि मोहिं राम दोहाई ॥
 तबै संत बोले मुसकाई । सेवत साधु पाप जरि जाई ॥
 महाभागवत मूर्ति बनाई । पूजहु तिन्हें सदा चित लाई ॥
 औरहु संत करहु सेवकाई । तरिजैहौ है राम दोहाई ॥

दोहा—अस कहि साधु चले गये, सो शठमानि गलानि ॥

रामानुज आदिकन की, राचि मूरति विधि ठानि ॥३१॥

पूजन लग्यो सप्रीति सो पापी । संतन नाम भयो मुख जापी ॥
 संतन सेवत अस चंडालै । बीत्यो जियत जगत कछु कालै ॥
 आयो अंतकाल जबताको । धाये यम भट धारि गदा को ॥
 कोऊ लिये हाथ महँ फांसी । लियो बाँधि तनु गोभत गांसी ॥
 सो शठ कीन्ही संत दोहाई । तब हरि पार्षद आये धाई ॥
 यमदूतन कहँ आँखि दिखाई । सो पापी कहँ लियो छोड़ाई ॥
 सूय्य समानँ विमान चढ़ाई । दियो ताहि हरिपुर पहुँचाई ॥
 तब यमकिंकर रोवत जाई । यमको दिय वृत्तान्त सुनाई ॥
 कह्यो बहोरि पाप अस कीन्हे । मिली मुक्ति प्राणिन दुख दीन्हे ॥
 तौ पुनि मनुज धर्म किमि करिहैं । हठि अधर्म पंथा पग धरिहैं ॥
 याको दीजै हेतु बताई । तब संदेह दूरि है जाई ॥
 तब यमराज संत शिरनाई । कह्यो साधु महिमा मुख गाई ॥

दोहा—महाभागवत सर्वदा, जे पूजै करि नेह ।

ते पापी सब पाप हत, जात अवशि हरि गेह ॥३२॥
 जे जग महँ हैं संत सनेही । मोते भीति लहैं नहिं देही ॥
 जे नित सेवत संतन चरना । ते विकुंठवासी सुख भरना ॥
 साधु चरण सेवक जग माहीं । कबहुँ समीप जाइयो नाहीं ॥
 संत उपासक जे बड़भागी । तिन पर जोर तुम्हार न लागी ॥
 अस दूतन यमराज बुझाये । दूत गये संतन शिरनाये ॥
 तब ते दूत करी यह रीती । देखि संत भागैं भरि भीती ॥
 अपने पूजन ते गिरिधारी । साधुन पूजा जानै प्यारी ॥
 जो साधुन गण जन सो मानै । कोटि वर्ष लगि नरक महानै ॥
 संतन देय सुवर्ण जो माशा । मेरु तुल्य तेहि पुण्य प्रकाशा ॥
 जो साधुन पद रज शिरधारी । नहिं मानै गति भई हमारी ॥
 सो प्रत्यक्ष पशु शृंग विहीना । नहिं फल सकल तासु कर कीना ॥
 तासों विमुख रहत रघुराई । जीवत कुयश मरे नरकाई ॥

दोहा—जे पथ श्रमित सुसंत कहँ, श्रमहि निवारत सेइ ।

ते सुकृती कहँ हरि अवशि, भव विनाश करि देइ ३३ ॥
 जे संतन पूजत अवशि, तिनहिं निवारत जोय ।
 स्वर्ग गवन तिनके करत, रोकत सुर सब कोय ३४ ॥
 जो जन निंदा साधुकी, करत एकहू बार ।
 नरक भोगि सो जन्म बहु, मूक होत संसार ॥ ३५ ॥
 जो हरि भक्त विलोकि कै, उठै न गर्वहि धारि ।
 होतो अवशि पहार को, सो पषाण युग चारि ॥ ३६ ॥
 जो सप्रीति पूजै सदा, संत चरण विधि युक्त ।
 जियत भोग भोगै विपुल, अंत होत हठि मुक्त ॥ ३७ ॥
 पग मीजै पंखा करै, बीरी देय खवाय ।

साधुनकी सेवा सदा, निज मानै यदुराय ॥ ३८ ॥
 संतन अर्चन छोड़िकै, जो पूजै हरि कोइ ।
 पूजा तासु मुकुंद प्रभु, ग्रहण करै नहिं सोइ ॥ ३९ ॥
 पढ़े विप्र षट्शस्त्र जो, कृष्ण भक्त नहिं होइ ।
 कृष्ण भक्ति जो जन करै, पंडित ते वर सोइ ॥ ४० ॥
 शूद्र श्वपचहू जाति को, राम रसिक जो होय ।
 भक्ति विगत वैदिकहु ते, अधिक विप्र ते सोय ॥ ४१ ॥
 भक्तिहीन जे विप्रजन, करहिं जे कर्म विधान ।
 ते सब निष्फल कर्म हैं, भक्ति सहित फल दान ॥ ४२ ॥
 कृष्ण प्रतिष्ठा ते अधिक, संत प्रतिष्ठा जान ।
 हरिते अधिक विचारिये, हरिको दास महान ॥ ४३ ॥
 तुलसी माला चिह्न ते, चिह्नित जो जन होइ ।
 ते भागवत सुजगत में, वेद पढ़े नहिं कोइ ॥ ४४ ॥
 माला चंदन चक्र धर, संतन को जग माहिं ।
 मानै नारायण सरिस, भेद कछू है नाहिं ॥ ४५ ॥
 आये साधुन भौन में, जो शठ पूजै नाहिं ।
 सात जन्मके पुण्य तेहिं, क्षीण होत क्षण माहिं ॥ ४६ ॥
 जो न खवावै साधुको, करिकै अति अनुराग ।
 सो जस भोजन करत हरि, यथा न मख को भाग ॥ ४७ ॥
 जो वैष्णवको देखिकै, करै नहीं परणाम ।
 जो प्रदक्षिणा देत नहिं, तापर कोपत राम ॥ ४८ ॥

जो कोइ तुलसी वृक्ष लगावै । सविधि सो हरिपूजन फल पावै ॥
 जो माधव मंदिर बनवावै । करै प्रतिष्ठा प्रभु पधरावै ॥
 सो हरि सँग विकुंठ पुर माहीं । करत विलास काल तेहि जाहीं ॥
 यथा गरुड़ अहिपति हरि केरे । ताहि करत हरि तथा निवेरे ॥

जो तुलसी दल शालिग्रामै । पूजित तापर तोषित रामै ॥
 विन तुलसी दल पूजन हीना । करै कोटि उपचार प्रवीना ॥
 गुरुकी करै सदा सेवकाई । गुरु रूठे रूठत यदुराई ॥
 गुरु प्रसन्न प्रसन्न मुरारी । हरि गुरुमें नहिं भेद विचारी ॥
 लखि त्रिदंड वैष्णवसंन्यासी । पूजन करै मानि मुद रासी ॥
 तेहि पूजत ज्ञानहु विज्ञाना । पावत जन कह वेद पुराना ॥
 करै न साधुन सों अभिमाना । होय नमित यदि विभव महाना ॥
 साधु चरण रज शिरमहँ धारै । तेहि जन पुनि न होत संसारै ॥

दोहा—यह साधुन महिमा कह्यो, साधुते अधिक नकोइ ॥

जो हरिको मिलिबो चहै, सेवै संतन सोइ ॥ ४९ ॥

ग्रंथ प्रपन्नमृत यह गायो । पूर्वाचार्य प्रबंध सुनायो ॥
 तामें अहै विपुल विस्तारा । मैं कीन्ह्यो संक्षेप उचारा ॥
 पै नहिं छूटे कोउ इतिहासा । कियो यथामति सकल प्रकासा ॥
 ग्रंथ रामरसिकावलि माहीं । सिगरी संत कथा दरशाहीं ॥
 अहै न कथा प्रपन्नमृत की । है रामानुजके शुभ मतकी ॥
 अति विचित्र है साधुन गाथा । कहे सुने जन होत सनाथा ॥
 जाके है नित संत अधारा । सो यदुपति कहँ प्राण पियारा ॥
 ताते मैंहूँ कियो विचारा । संतन कर है मोर उधारा ॥
 सुनै जो सुमति प्रपन्नमृत को । सानुराग वणै शुभ मतिको ॥
 ते सज्जन यह मोरि ठिठाई । क्षमा करै विगरी बनिआई ॥
 संत चरित कहँ अखिल अपारा । कह मैं कुमति लचार अचारा ॥
 पै जो कछु मोसों बनिआई । सो यह करी संत सेवकाई ॥
 दोहा—नहिं विद्या नहिं तप सुकृत, नहिं शुभ मति हरि नेह ।

पै साधुन सेवन करत, नहिं उधार संदेह ॥ ५० ॥

मैं अपनी का दशा बखानौ । निजते लघु मोहूँ कहँ जानौ ॥

चंचल चित तिय वित नित राचो। अधरम रत भगवत मतकांचो॥
 पूरव पुण्य उदय कछु भयऊ । ताते साधु शरण है गयऊ ॥
 यही आधार एक है मोरे । और सुकृत नहिं कछु जग जोरे॥
 मोहिं साधु शरणागत जानी । कर उद्धार अधम अति मानी॥
 श्रोता तुम सब सुमति सुहाये । सुनन रामरसिकावलि आये ॥
 तिनहिं मोरि बहु बार प्रणामा । क्षमहु चूक बिगरो जो कामा ॥
 जो यह बाँचै ग्रंथ सदाहीं । मोर प्रणाम अहै तेहि काहीं ॥
 विनयमोरी सबसों यहि भाँती । देहु यही वर करि दृढ़ छाती ॥
 संत चरण उपजै नवनेहू । होय न संतन मह संदेहू ॥
 मानहि संत मोहिं लघु दासा । याते अधिक मोरि नहिं आसा ॥
 रचत रामरसिकावलि केरे । विद्या गुरु रामानुज मेरे ॥

दोहा—तिनके चरण कृपाविवश, सहजहिमें यह ग्रंथ ।

रच्यो प्रपन्नामृत विमल, दायक शुभ सतपंथ ॥ ५१॥

जय मुकुंद हरि गुरु चरण, जय जय पितुविश्वनाथ॥

जय गुरु रामानुज विमल, मोको कियो सनाथ॥ ५२॥

इति सिद्धिश्रीमन्महाराजाधिराजबांधवेशविश्वनाथसिंहात्मजसिद्धि
 श्रीसामराजमहाराजाधिराजश्रीमहाराजाबहादुरश्रीरुष्णचंद्र
 रुपापात्राधिकारिश्रीरघुराजसिंहजूदेवकृतौरामरसिकावल्यां
 कलियुगखंडेपूर्वार्धःसमाप्तः॥

श्रीः ।

भक्तमाला.

अथ कलियुगखंड उत्तरार्ध प्रारम्भः ।

सोरठा—जय रघुकुल वन कंज, विदित दिवाकर दिशि दिपत ॥
संत कोक मन रंज, सुयश भोर हत दुख निशा ॥ १ ॥
जय यदुकुल उड़इंदु, सत चकोर चायक चतुर ॥
कीरति जोन्ह अनिंदु, कुमुद दीन मुद दायने ॥ २ ॥
दोहा—जय गणपति जय जय गिरा, जय जय संत समाज ॥
रचित रामरसिकावली, उत्तरार्द्ध रघुराज ॥ ३ ॥
ग्रंथ रामरसिकावली, भे समाप्त त्रैखंड ॥
पुनि विरच्यो कलि खंड को, पूर्वार्द्ध उदंड ॥ ४ ॥
सकल प्रपन्नामृत कथा, तामें वचन न कीन ॥
पूर्वाचार्यनकी कथा, औरहु कथा नवीन ॥ ५ ॥
श्रोता सब मन दै सुनहु, उत्तरार्द्ध कलिखंड ॥
यामें कलि भक्तन कथा, वर्णित अहै अखंड ॥ ६ ॥
श्रीमुकुंद हरि गुरु चरण, रज धरि अपनो माथ ॥
तैसहि सुखित नवाइ शिर, महाराज विश्वनाथ ॥ ७ ॥
श्रोता सुनहु सुशील सब, श्रद्धा सहित सप्रीति ॥
उत्तरार्द्ध कलिखंड को, सुनत भगत कलि भीति ॥ ८ ॥

अथ विष्णुस्वामीकी कथा ॥

दोहा—प्रथम विष्णुस्वामी कथा, श्रोता सुनहु सुजान ॥
जाहि सुनत जाने परत, अहै जानकी जान ॥ ९ ॥

भये विष्णुस्वामी हरि दासा । जिन जग यश शशि सरिस प्रकासा ॥
 जग महुँ विचारि २ सब ठोरा । हरि विमुखिन किय हरिकी ओरा ॥
 वेद पुराण शास्त्र सब ज्ञाता । बहु देशन उपदेशन दाता ॥
 एक समय नीलाचल काहीं । कियो पयान शिष्य सँग माहीं ॥
 जब जगदीशपुरी महुँ गयऊ । अरुण खम्भ ढिग ठाढ़ो भयऊ ॥
 फूलडोल उत्सव तहँ रहेऊ । निकसत कढ़त मनुज दुख सहेऊ ॥
 देखि विष्णुस्वामी जन भीरा । मन महुँ कियो विचार गँभीरा ॥
 जो हम शिष्य सहित तहँ जैहैं । तौ सँग के जन अति दुख पैहैं ॥
 ताते मंदिर पाछे जाई । बैठी कछुक काल चितलाई ॥
 अस विचारि मंदिरके पाछे । बैठे शिष्य सहित प्रभु आछे ॥
 गुनि जगदीश दास की आशा । तेही ओर किय द्वार प्रकाशा ॥
 यात्री लखि पश्चिम को द्वारा । धाये दर्शन हेतु हजार ॥
 दोहा—निरखि विष्णुस्वामी तहाँ, मनुजन की अति भीरं ॥

बैठे दक्षिण द्वार चलि, ध्यावत श्रीयदुवीर ॥ २ ॥

प्रगट्यो तब दक्षिणहुँ द्वारा । धाये जन तहँ और हजार ॥
 कसमस परचो कढ़त तेहि ओरा । स्वामी गे पुनि उत्तर ओरा ॥
 उत्तरहुँ निज जनके काजा । प्रगट्यो प्रभु दराज दरवाजा ॥
 देखि विष्णुस्वामी प्रभुताई । गुणी अचर्ज मनुज समुदाई ॥
 गिरे विष्णु स्वामी पदआई । धन्य २ मुख गिरा सुनई ॥
 विदित विष्णु स्वामी करकाजा । अबलों तहाँ चारि दरवाजा ॥
 यहि विधि और अनेक चरित्रा । विमल विष्णुस्वामीके चित्रा ॥
 कहँलौं करो विशेष वषाना । जाहिर है सब भांति जहाना ॥
 तिनके भये शिष्य बहुतेरे । तिनहुनके परभाव चनेरे ॥
 निज प्रभाव संप्रदा चलाई । जिनहिं सुमिरि भवनिधि तरि जाई ॥
 ताते मैं कीन्हों संक्षेपा । लघु गुनि कियो न कछु आक्षेपा ॥

यह संप्रदा विष्णु स्वामी की । हठि दायिनि गति खग गामीकी॥
 दोहा—और कथा सुनिवे हितैं, श्रोता जो मन देहु ॥
 विष्णुस्वामि मत बुधन ते, तौ सादर सुनि लेहु ॥ ३॥
 इति श्रीरामरसिकावल्यांकलियुगखंडउत्तरार्द्धप्रथमोऽध्यायः ॥ १ ॥

अथ श्रीमध्वाचार्यकी कथा ॥

दोहा—मध्वाचारजकी कथा, अब वरणौ चित लाय ॥

जासु नाम यश मध्य मत, रह्यो जगतमहँ छाय ॥१॥
 मध्वाचार्य महा उपकारी । दीन्ह्यो हरि विमुखीन सुधारी ॥
 हरि रति सूखे मनुज तड़ागा । वन इव भरन भक्ति जल लागा ॥
 देशन देशन करत पयाना । थापत निज मत विविध विधाना ॥
 एक समय गवन्यो पंजावा । विमुखिन सुमुख करन मन लावा ॥
 मारग महँ इकशिला निहार्यो । बैठि ताहि महँ ईश सँभार्यो ॥
 पाछे परे शिष्य सब तिनके । रहे संग महँ सेवक जिनके ॥
 बैठि अकेले शिला मँझारी । ध्यायो हरि नहि आंखि उवारी ॥
 तेहि मारग ह्वै सहित समाजा । कव्यो चक्रवर्ती महाराजा ॥
 संग तुरंग मतंग अनंता । रथ पैदल दल विविध लसंता ॥
 मध्वाचार्य मार्ग मधि बैठे । अचल समाधि महोदधि पैठे ॥
 गर्वो भूपति तिनहि निहारी । मान्यो महापखंडहि धारी ॥
 रह्यो राज सिंधुर असवारा । पीलपाल सों वचन उचारा ॥
 दोहा—यह पाखंडी मार्ग मधि, बैठो करि पाखंड ॥

तेहि कचरावत काढ़ि चलो, याको है यह दंड ॥ १ ॥
 अस कहि करि करीनकी पांती । तिमि तुरंग पैदलहु जमाती ॥
 चल्यो माध्व मतनाथहि ओरा । तब अस कौतुक भो तेहि ठोरा ॥
 रथ पैदल मातंग तुरंगा । तेहि क्षण भे थम्भित सब अंगा ॥

सबके उठत न पाँव उठाये । मनहुँ भूमि महुँ अहैं जमाये ॥
 पीलपाल पीलन कहँ पेले । अश्वपाल अश्वन कहँ रेलै ॥
 पैदर कूदि गिरे तेहिं ठामा । रथ चाके चापे वसुधामा ॥
 यह नैनन नरनाह निहारी । महापुरुष तेहिं लियो विचारी ॥
 तज्यो तुरत नागहि नरनाथा । गिरचो चरण महुँ भूधरि माथा ॥
 त्राहि त्राहि आरत कह वैना । भयो भूप तेहिं क्षण दुख ऐना ॥
 मध्वस्वामि तेहि समय दयाला । तापर कीन्ह्यो कृपा विशाला ॥
 सदल नरेश शिष्य करि लीन्ह्यो । भव भय सकल दूरि करि दीन्ह्यो
 ऐसे मध्वाचारज केरे । अहैं चरित्र विचित्र घनेरे ॥
 दोहा—मध्वाचारजके मती, अबलों भक्त प्रधान ॥

अबलों दीसत भेद बहु, जाहिर जगत जहान ॥ १ ॥

इति श्रीरामरसिकावल्यंकलियुगखंडे उत्तरार्द्धे द्वितीयोऽध्यायः ॥ २ ॥

अथ श्रीनिबार्कस्वामीकी कथा ॥

दोहा—निबार्क स्वामी चरित, अब वर्णों चितलाय ॥

श्रद्धा युत श्रोता सुनहुं, मंगल मोद निकाय ॥

निबादित भेभानु समाना । नाम करन निहार अज्ञाना ॥
 भगवत धर्म कर्म सबकीन्ह्यो । निजमति दृढ थापित करि दीन्ह्यो
 एक समय हरि उत्सव माहीं । किय निवतो द्विज संतन काहीं ॥
 ताही क्षण दंडी इक आयो । ताहूको नेवतो पठवायो ॥
 सहसन संतन होति रसोई । अस्ताचलहि रहे रवि गोई ॥
 तेहि दंडी कर प्रण अस रहई । भानु विगत भोजन नहिं गहई ॥
 जब भोजन हित ताहि बोलायो । तब सो यह संदेश पठायो ॥
 यतिन राति भोजन नहिं होई । यह प्रसंग जानै बुध जोई ॥
 सुनि निबार्क यती संदेशा । मान्यो मन महुँ परम कलेशा ॥

साधु नेवति भोजन नहिं देई । घोर दंड पावहिं जन तेई ॥
अति आशंकित भे तेहि काला । सुमिरत भये नंदके लाला ॥
रह्यो एक कंकण कर माहीं । फैंक्यो एक नीमतरु पाहीं ॥

दोहा—तासु प्रकाश दिनेश सम, फैल्यो चारिहुँ ओर ॥

यह चरित्र लिखिकै सकल, भयो जनन को भोर ॥ १ ॥
तब भोजन हित संतन काहीं । बोलि पठायो निज घर माहीं ॥
निम्ब वृक्ष महुँ भानु निहारी । अतिअचरजसब लियोविचारी ॥
पुनि तेहिं दंडी काह बोलायो । जो दिन भोजन नेम सुनायो ॥
सो आदित्य निंब महुँ देखी । भोजन कियो विनोद विशेषी ॥
अहो सत्य तुम हरि अवतारा । यह सिंगरे परभाव तुम्हारा ॥
तबते सकल जगत महुँ आमा । निंबादित्य परचो असनामा ॥
निंबारकको मत संसारा । भयो प्रचार उदार अपारा ॥
निंबारककी कथा अनेकू । विश्व प्रसिद्ध अहै सविवेकू ॥
मैं ताते संक्षेप बनायो । विस्तर ग्रंथ भीति नहिं गायो ॥
निंबारक के मत अवलंबी । सकल कथा जानहिं लघुलंबी ॥
श्रोतादिक देवहु जनि खोरी । सुनि गुनि मंद मनीषा मोरी ॥
यदापि कथा वर्णत नहिं तोषा । अति विस्तर तद्यपिकविदोषा ॥

दोहा—निंबारक मत अति प्रबल, अबलों विश्वमँझार ।

चंद्र चंद्रिकाके सरिस, फैल्यो अधम उधार ॥ २ ॥

इति श्रीरामरसिकावल्यांतृतीयोऽध्यायः ॥ ३ ॥

अथ श्रुतप्रज्ञकी कथा ॥

दोहा—भक्ति भूमि धारक सरिस, दिग्गज चारि महंत ।

रामानुज गुरुभ्रात जग,मंगल करन लसंत ॥ १ ॥

सनकादिकके सरिसते, परे विरक्तहि जोय ॥

तिनको नाम प्रभाव अब, कहौं सुनहु सब कोय ॥२॥

अब श्रुत प्रज्ञज नाम गज, ऋषभ सरिस परधान ।

तासु कथा वर्णन करूं, श्रोता सुनहु सुजान ॥ ३ ॥

जबते भे श्रुतप्रज्ञ सयाने । नारायण तजि और न जाने॥
रटन लगी रसना हरि नामा । लग्यो न रंग तीय धन धामा ॥
देशन देशन विचरन लागे । सिखवत राम जनन अनुरागे॥
गे श्रुतप्रज्ञ जौनही देशा । तहँके जन भे विगत कलेशा ॥
जातिभेद सब वैष्णव माहीं । राख्यो अपने जिय महँ नाहीं॥
रामा भक्ति सब मूल अचारा । सोई कियो जगत परचारा ॥
एक समय नीलाचल काहीं । जात रहै वैष्णव सँग माहीं ॥
जब कछु दूरिधाम रहि गयऊ । तबइक श्वपच मिलत मग भयऊ॥
लौढ्यो सो प्रभु दर्शन कीन्ह्यो । महाप्रसाद वेत कर लीन्ह्यो ॥
श्वपच विलोकत संत समाजा । धायो मानि सकल कृत काजा॥
दंड सरिस श्रुतप्रज्ञ चरणमें । गिरत भयो गहि चरण करनमें॥
आंखिन बही अंबुकी धारा । रह्यो न तासु शरीर सँभारा ॥
तेहि श्रुतप्रज्ञ लियो उर लाई । प्रेम विवश तनु सुरति भुलाई॥
दोहा—दंड द्वैक महँ जब श्वपच, कीन्ह्यो सुरत शरीर ।

तब धिक् धिक् मुख वचन कहि, बोलत भयो अधीरा॥४॥
जाति श्वपच मैं महा अपावन । विप्र जाति तुमहौ अतिपावन॥
मोसों भयो महा अपराधू । क्षमहि मनुज कर अवगुणसाधू॥
नीच जाति मैं प्रभुपद परस्यो । जाति सुरति मैं प्रथमनदरस्यो॥
तब श्रुतप्रज्ञ वसन निज लैकै । पोंछन लगे तासु अँग हँकै ॥
कियो तासु गुरु सम सत्कारा । जोरि पाणि पुनि वचन उचारा॥
अहौ अधिक तुम हमते भाई । आवहु महाप्रसादहि पाई ॥

देहु हमहुँको महाप्रसादा । याते नहिँ अचार मर्यादा ॥
 सो दिय महाप्रसाद तुरंता । धरचो ताहि मुखमें मतिवंता ॥
 । कि प्रभात विदा तेहिँ काहीं
 आप गये जगदीशपुरीको । बाँधो जगपाति धर्म धुरीको ॥
 होत भई तहँ संत समाजा । तिनमें तिनको नाम दराजा ॥
 तहँ निवास कीन्हो कछु काला । तनुतजि गवन्योलोकविशाला ॥
 दोहा—संत सनेही जगत में, सो श्रुतप्रज्ञ समान ।
 होत भयो अबलों न कोउ, जाहिर सुयश जहान ॥५॥
 इति श्रीरामरसिकावल्यांकलियुगखंडे उत्तरार्द्धे चतुर्थोऽध्यायः ॥ ४ ॥

अथ श्रुतदेवकी कथा ॥

दोहा—अब श्रुतदेव कथा कहौं, श्रोता सुनहु सुजान ।
 दिग्गज पुष्कर नाम जो, ताको भयो समान ॥ १ ॥
 संत जातिमें भेद विसारा । राम नाम वसु याम उचारा ॥
 वृत्ति विराग ज्ञान ते पूरी । कृष्ण भजन ते भयो न दूरी ॥
 सो श्रुतदेव विदित जग माहीं । संगहि संत समाज सदाहीं ॥
 साधुसमाज जोरि जग भावन । विचरचो पुहुमि करत जन पावन
 विचरत २ सो इक काला । एक देश महँ गयो कृपाला ॥
 तहँको रह्यो अभक्त नरेशा । तासु प्रभाव अभक्तहु देशा ॥
 संत समाज समेत तहाँहीं । गयो श्रुतदेव जबै पुर माहीं ॥
 मज्जन हित गे संत अनेका । रह्यो न नगर सारित सर एका ॥
 रहे कूप वापी बहुतेरे । उपवन बाग वाटिका नेरे ॥
 भरन लग्यो जल मज्जन हेतू । तब माली कह सुनहु अचेतू ॥
 यह जल है हित सींचन बागा । काहू मज्जन हेतु न लागा ॥
 ॥ माली भरन दियो जल नाही । चलयो संत शोकित मन माहीं ॥

दोहा—यहिविधि जहँ जहँ साधुगे, वापी कूप समीप ।

तहँ तहँ माली रोंकि दे, शासन भाषि महीप ॥ २ ॥
 तहँ श्रुतदेव समीप सिधारी । दुखित संत सब गिरा उचारी ॥
 है पुर सहित शरण ते खाली । वापी कूप न रोंकत माली ॥
 कहँ मज्जन हित जाहि कृपाला । मज्जन हित प्रभु होत विहाला ॥
 तब श्रुतदेव कह्यो मुसक्याई । अहै ईश ऐसही रजाई ॥
 करहु भजन बिन मज्जन कीन्हे । मिली नीर अनते चलि दीन्हे ॥
 तब सब सज्जन मज्जन हीना । करन लगे तहँ भजन प्रवीना ॥
 दंड एक महँ तहँ पुर माहीं । रह्यो कूप वापी जल नाहीं ॥
 परचो नगर महँ हाहाकारा । प्रजा पुकार कियो नृप द्वारा ॥
 भूप सचिव लै कियो विचारा । तब माली चलि वचन उचारा ॥
 आयो एक साधु नृप बागा । मज्जन हेतु भरन जल लागा ॥
 मैं तेहि भरन दियो जल नाहीं । दुखित गयो फिरि आश्रम काहीं ॥
 इक श्रुतदेव नाम हरिदासा । रहत संत सो तिनके पासा ॥

दोहा—नृप मंत्री सावंत सब, कारण सकल विचारि ।

परे चरण श्रुतदेवके, त्राहि पुकारि पुकारि ॥ ३ ॥

प्रजा सचिव नृप सुभट सब, भे शरणागत तासु ।

शरणागतके होतहीं, मिटी जनन सब त्रासु ॥ ४ ॥

पार्थिव प्रजा समेत सो, पावन ह्वै गो देश ।

धन्य धन्य हरि भक्त जग, हरहिं कलेश अशेश ॥ ५ ॥

इति श्रीरामरसिकावल्यांकलियुगखंडे उत्तरार्द्धे पंचमोऽध्यायः ॥ ५ ॥

अथ श्रुतिउदधिकी कथा ॥

दोहा—शीलउदधि हरि रति उदधि, उदधि ज्ञान विज्ञान ।

वरणों श्रीश्रुति उदधिको, अमी उदधि आख्यान १॥
 श्रीश्रुति उदधि नाम जिन केरो । वामन दिशि गज सम तेहि हेरो
 भगवत भक्ति भूमि शिरधारचो । दिग्गज सरिस सुयश विस्तारचो
 दिय निज सर्व ससंतन हेतू । निशिदिन करहि भावना नेतू॥
 रह्यो इकांत शांत अति दांता । शास्त्र प्रात बोधक वेदांता ॥
 विदित विनोदित विश्व विहारी । अधम अज्ञान उदोत उज्यारी॥
 अस श्रुति उदधि करत संचारा । गंगा मज्जन हेतु सिधारा ॥
 मारग महँ इक नृपपुर रहेऊ । तेहि उपवन निशि निवसत भयऊ
 तेहि निशि चोर राज घर जाई । चोरी कियो वित्त समुदाई ॥
 चोर भागि तेहि उपवन आये । खबरि पाय भूपति भट धाये॥
 बचत न चोर जानि जिय माहीं । माला पहिरायो तेहि काहीं ॥
 सो श्रुति उदधि मगन हरिध्याना । माला पहिरावत नहि जाना॥
 चोर भागिगे दूरि अदेखे । भूपति भट श्रुति उदधिहि देखे॥

दोहा—तिनहि निरखि मणिमालयुत, जानि भूप भट चोर ॥

पकरि बाँधि लै चलत भे, तुरत राजवर ओर ॥ २ ॥

भूपति देखि कोप अति कीन्ह्यो । तेहि बँधवाय कोठरी दीन्ह्यो॥
 तामें महाधूप करि दयऊ । तेहि हरिध्यानभान नहि भयऊ
 बाँधे बीति गई निशि जबहीं । भूपतिशीश पीर भै तबहीं ॥
 वैद्य अनेकन औषध दीन्हे । मिटी न पीर यतन बहु कीन्हे॥
 तब अनुमान सचिव अस साँधे । बीती निशा संत इक बाँधे ॥
 यहि कारण अब मिटत न पीरा । तजहु संत नतु नशी शरीरा ॥
 तब खोल्यो कोठरी किंवारा । बैठे जहँ श्रुतिउदधि उदारा ॥
 कछु नहि भान भयो तनु माहीं । को पीरा दीन्ह्यो केहिकाहीं ॥
 तब राजा मुख त्राहि पुकारी । दियो चरणमहँ मस्तकधारी ॥
 कह्यो क्षमहु अपराध हमारा । तब श्रुतिउदधिहुचखन उवारा॥

कह्यो कौन कीन्ह्यो अपराधा । काह क्षमाबहु केहिकीबाधा ॥
मोहिं परचो अबलों नहिं जानी । बैठि इकांत भावना ठानी ॥

दोहा—तब राजा बोलत भये, देहु हाथ मम माथ ।

अब शरणागत मोहिं करि, कीजै नाथ सनाथ ॥ ३॥

तब भूपति शिर हाथधरि, हरचो सकल शिरपीर ।

ताहि मंत्र उपदेश करि, कियो भक्त रघुवीर ॥ ४ ॥

इति श्रीरामरसिकावल्यांकलियुगखंडेउत्तरार्द्धेष्टोऽध्यायः ॥ ६ ॥

अथ श्रुतिधामकी कथा ॥

दोहा—अब वरणों श्रुतिधाम को, रघुपति भक्त अनन्य ।

नाम पराजित दिशि करी, भयो तासु सम धन्य ॥ १ ॥

श्रीहरिभक्त अनन्य उदारा । हरि हरिजन नहिं भेदविचारा ॥
कंठी माला धारण काहीं । किय प्रणाम प्रभु गुनि मन माहीं ॥
हरि यश रहित कथा नहिं सुनेऊ । नहिं अभक्त भाषण चित गुनेऊ ॥
संतन नाम रूप यश धामा । मान्यो हरि समान वसुयामा ॥
जहँ जहँ होय राम गुण गाथा । तहँ तहँ लै सब संतन साथ ॥
करै श्रवण मन मगन प्रेम में । बहत कलिल दृग सहित नेममें ॥
यहि विधि विचरत वसुधा माहीं । छायो सुयश विमल चहुँवाहीं ॥
एक समय लै संत अनंता । तीरथपति गवने मतिवंता ॥
कियो त्रिवेणी महँ अस्नाना । वर्णन लागे कथा पुराना ॥
संत मंडली जुरी अपारा । तहाँ संत इक वचन उचारा ॥
नाथ बड़ो कौतुक मनलागत । यह संदेह न जियते भागत ॥
वण्यो यहि विधि वेद पुराना । सो हम सुना वार बहु काना ॥

दोहा—गंगा यमुना सरस्वती, संगम वेणी नाम ।

गंगा यमुना लखिपरै, नहिं सरस्वती ललाम ॥ २ ॥

ताको हेतु बतावहु नाथा । विनती करौं नाथ पद माथा ॥
 तब श्रुतिधाम कह्यो अस वयना । देखहु सकल संत निज नयना ॥
 घटिका द्वै महँ सरस्वति धारा । वेणी मधि निकसति सुखसारा ॥
 तब सब साधु आचरज मानी । वेनी लगे निहारन ज्ञानी ॥
 घटी द्वैक महँ जमुना ज्वैकै । पश्चिमसरस्वति कूपहि हैकै ॥
 वही सरस्वतीकी तहँ धारा । अरुण वर्णते हि तेज अपारा ॥
 उठि उठि संत विलोकन लागे । श्रीश्रुतिधाम वचन अनुरागे ॥
 श्रीश्रुतिधाम ध्यान धरि धीरा । बैठिअचल सुभिरत रघुवीरा ॥
 संत कह्यो मज्जन प्रभु करहु । सरस्वति धार देखि सुख भरहु ॥
 तब श्रुतिधाम उठे सुख छाई । मज्जन कीन्ह्यो सरस्वति जाई ॥
 जय ध्वनि रही चहुँदिशि छाई । सबै करी श्रुतिधाम बड़ाई ॥
 लाखन मनुज मकरके वासी । मज्जन करि भै आनँद रासी ॥

दोहा—औरहु श्रीश्रुतिधाम के, अहँ चरित्र अपार ।

विस्तरकी भय मानि उर, मैं नाहिं कियो उचार ॥३॥

इति श्रीरामरसिकावल्यांकलियुगखंडे उत्तरार्द्धे सप्तमोऽध्यायः ॥ ७ ॥

अथ लालाचार्यकी कथा ।

दोहा—लालाचारज को कहौं, अब सुंदर इतिहास ॥

जाहि सुनत हरि जनन में, दृढ़ उपजत विश्वास ॥१॥

लालाचारज एक हरिदासा । प्रगटे द्राविड दक्षिण आसा ॥
 श्रीरामानुजके जामाता । सकल शास्त्र महँ महि विख्याता ॥
 एक समय यतिराज समीपा । कीन्ह्यो विनय सुखद कुल दीपा ॥
 सब संतन महँ हे यतिराज । राखहुँ कौन भाँति मैं भाऊ ॥
 रामानुज बोले मुसक्याई । मानहु सकल संत कहँ भाई ॥

तबते लालाचारज ज्ञानी । संतन भ्राता सम लिय मानी ॥
 एक समय कावेरी माहीं । भोर समय तहँ मज्जन काहीं ॥
 लालाचारज केरी नारी । जात भई तिय संग सिधारी ॥
 तहँ इक मृतक तिलक युत माला । बहि आयो सरिता तेहिंकाला ॥
 तब लालाचारज तियकाहीं । हँसी तिया लखि मृतक तहांहीं ॥
 तेरो देवर आवत बहतो । देखत सबै कोऊ नहिं गहतो ॥
 तब लालाचारजकी नारी । चलि घर पतिसों गिरा उचारी ॥

दोहा—कावेरी इक मृतक लखि, देवर मोर बनाय ॥

कियो सकल हाँसी तिया, यह दुख सह्यो न जाय २
 लालाचारज सुनि यह बाता । ल्याये पकरि मानि तेहि भ्राता ॥
 क्रिया कर्म भ्राता सम कीन्ह्यो । विप्रन सकल निमंत्रण दीन्ह्यो ॥
 कह्यो विप्र यह बंधु न तेरो । नहिं मनिहै जो नेवता फेरो ॥
 तब रामानुजके ढिग जाई । लालाचारज कह बिलखाई ॥
 तब तो संतन मानत कोई । कौन भाँति भोजन प्रभु होई ॥
 तब यतिपति बोले कछु कोपी । जे तेरे नेवताके लोपी ॥
 तिनको जानहु परम अभागी । तुव नेवता विकुंठ लागि लागी ॥
 अस कहि यतिपति किय आकर्षण । भेज्यो निज पार्षद संकर्षण ॥
 ते सब विप्र स्वरूप सोहाये । लालाचारजके घर आये ॥
 भोजन करि लहि कै सत्कारा । कियो गगन पथ ह्वै संचारा ॥
 जात गगन पथ तिनहिं निहारी । सकल विप्र आश्चर्य्य विचारी ॥
 लालाचारज के घर जाई । जूठन खान लगे पछिताई ॥

दोहा—लालाचारज की कथा, यहि विधि अहै अनंत ॥

विस्तर भय भाष्यो नहीं, क्षमा कियो सब संत ॥३॥

इति श्रीरामरसिकावल्यांकलियुगखंडे उत्तरार्द्धे अष्टमोऽध्यायः ॥ ८ ॥

अथ गुरु चेलाकी कथा ॥

दोहा—गुरु चेला की अब कहौं, कथा परम कमनीय ॥

सुनहु सकल श्रोता सुमति, कर्म अनिर्वचनीय ॥ १ ॥

गुरु चेला गंगा तट दोऊ । रहे वसत आनंदित सोऊ ॥
लगे गुरु बदरीवन जाने । चेला को अस वचन बखाने ॥
जबलों इत आऊँ मैं नाहीं । तबलगि वस्यो गंग तटमाहीं ॥
कह्यो शिष्य विन दर्श तुम्हारा । होई को इत मोहि अधारा ॥
गुरु कह जबलों दरशन मोरा । तबलगि है गंगा गुरु तोरा ॥
अस कहि गयो गुरु बदरीवन । शिष्य गुन्यो सुरसरि गुरु ताक्षन
तबते शिष्य देवसरि माहीं । मज्जनहेतु हिल्यो पुनि नाहीं ॥
कियो कूप जल सों सबकाजा । मान्यो नहीं जगतकी लाजा ॥
तब गंगातटके सब वासी । मान्यो ताहि धूत संन्यासी ॥
जब बदरीवन ते गुरु आये । तासु दशा तिनसों सब गाये ॥
महामूढ़ है शिष्य तुम्हारा । गंगा तजि किय कूप अधारा ॥
तब गुरु अचरज गुनि मनमाहीं । चले गंग महुँ मज्जन काहीं ॥

दोहा—चले शिष्य सब संग महुँ, तेहुको लियो बोलाय ॥

गये गुरुहिलिय सलिल में, और शिष्य समुदाय ॥ २ ॥

सो गुरु मानि देवसरि काहीं । धरचो सलिल महुँ निज पदनाहीं
तब गुरु तासु परीक्षा हेतू । बोले वचन बाँधि मन नेतू ॥
धरचो तीर कौपीन हमारा । ल्याउ शिष्य मो ढिग यहि वारा ॥
तब शिष्यहि पर गो संदेहा । केहि विधि बचै गंग गुरु नेहा ॥
हे गंगा राखहु मम लाजा । परिगो महाकठिन अब काजा ॥
तब सुरसरि निज भक्त विचारी । प्रगट कियो को तुक यह भारी ॥
जहुँ शिषि तहुँ ते गुरु पर्यन्ता । प्रगटे पद्मिनि पत्र अनन्ता ॥
तिन पद्मिनि पत्रन पग दैकै । चलयो शिष्य गुरु सुमिरण कैकै ॥

बूढ़े पद्मिनि पत्र न जल में । लखि अचरज माने तेहि थल में ॥
 गुरु निहारि यह शिष्य तमासा । कीन्ह्यो तापर पूर विश्वासा ॥
 कहत रहे जे ताहि पखंडी । हांसी योग भये ते दंडी ॥
 तब गुरु ताहि अङ्क बैठायो । जयजयशब्द जगत महँछायो ॥
 दोहा—गुरु ते चेला भो अधिक, नहिं अचरज उर लाव ॥
 यह सिगरो तुम जानियो, सरसुरि भक्ति प्रभाव ॥ ३ ॥
 शत श्रीरामरसिकावल्यांकलियुगखंडे उत्तरार्द्धे नवमोऽध्यायः ॥ ९ ॥

अथ देवाचारजकी कथा ॥

दोहा—श्रुति विचित्र वर्णन करों, श्रोता सुनहु सुजान ॥
 देवाचार्यके भक्त को, यह सुंदर आख्यान ॥ १ ॥
 देवाचारज तिनको नामा । भयो भक्त इक पूरण कामा ॥
 साधुन मंडल मोद प्रदाता । ध्यायो नित हरि पद जलजाता ॥
 जौन देशमहि कियो पयाना । पावन भे तहँके जन नाना ॥
 एक समय गवने सो काशी । पंथ मिली नगरी छविराशी ॥
 विमल वाग महँ कियो निवासा । तहँ इक अर्जुन पादप खासा ॥
 मज्जन करि ध्यावत जगबंधू । बाँचन लागे दशमस्कंधू ॥
 यमला अर्जुन कह्यो प्रसंगा । जुरे बहुत जन साधुन संग्गा ॥
 कथा प्रसंग लग्यो अध्याया । तब यह कौतुक तहँ प्रगटाय्गा ॥
 आकस्मात् भयो तरु पाता । कह्यो पुरुष इक अति अवदाता ॥
 सो देवाचारज पद वंदी । चढ़ि विमान गो लोक अनंदी ॥
 जातसमय अस बोल्यो वैना । मोरे पुण्यलेश कछु हैना ॥
 पूरुवजन्म केर हौं पापी । परतियगामी चुगुल सुरापी ॥
 दोहा—सांसति सो मम मीच भै, नरक गये लै दूत ॥
 तहाँसहस्रन वर्षलों, भोग्यों दुःख अकूत ॥ २ ॥

फेरि लह्यो तरु जन्म को, लहि तुव कथा प्रभाव ॥

अब अपाप है जात हों, उर अति बड़ो उराव ॥ ३ ॥

इति श्रीरामरसिकावल्यांकलियुगखंडेउत्तरार्द्धदशमोऽध्यायः ॥ १० ॥

अथा हरियानंदकी कथा ॥

दोहा—अब सुनिये चित दै सकल, हरियानंद आख्यान ॥

जाहि सुनत सब संतके, उपजत मोद महान ॥ १ ॥

हरियानंद भागवत पूरे । हरि आनंद रहत नहिं झूरे ॥
दिनप्रति करै साधुसेवकाई । माया विभव विलास विहाई ॥
एक समय अषाढ़ जब आयो । श्रीजगदीश दरश चितचायो ॥
रथयात्राके अवसर माहीं । रथ पर लख्यो जाइ हरि काहीं ॥
रुख्यो रह्यो रथ टर्यो न टारे । जगन्नाथ जय मनुज उचारे ॥
हरियानंद गयो रथ नेरे । सब मनुजन वाणी अस टेरे ॥
छोड़ि देहु रथ नाथ चलै हैं । लाखन जन अभिलाष पुजै हैं ॥
छोड़ि दिये तब सब रथ काहीं । माने अति कौतुक मन माहीं ॥
निज जन प्रण पूर्यो यदुराई । आकस्मात चल्यो रथ धाई ॥
द्वै शत पग रथ बिना चलाये । चलो गयो घर घर ख छाये ॥
हरि आनंद चरणमें आई । गिरी सकल जनकी समुदाई ॥
माचिरह्यो सब थल जयकारा । अस प्रभाव हरि जन संसारा ॥

दोहा—यहि विधि हरियानंद के, और अमित इतिहास ॥

कहँ लों मैं वर्णन करों, गंथ बढनकी त्रास ॥ १ ॥

इति श्रीरामरसिकावल्यांकलियुगखंडेउत्तरार्द्धएकादशोऽध्यायः ११ ॥

अथ राघवानंदकी कथा ॥

दोहा—हरिजन हरियानंदके, शिष्य राघवानंद ।

तिनको अब इतिहास मैं, वर्णत हों सानंद ॥ ३ ॥

भक्त राघवानंद सुजाना । भये अनूप प्रभाव जहाना ॥

चारिहु आश्रम चारिहु वरणा । कीन्ह्यो सन्मुख यदुपति चरणा॥
 जेहि जेहि देशन कियो पयाना । दै उपदेश दियो निर्वाणा ॥
 साधु शिरोमणि सज्जन साँचो । रोज २ रघुपति रति रांचो ॥
 एक समय काशी में आये । वास करत कछु काल बिताये॥
 एक दिवस गत दिन इक कामा । मय पंडित समाज तेहि ठामा
 तेहि क्षण नृपसुत करन समाश्रय।बोल्यो करन कृष्ण की आश्रय
 तेहि क्षण दौरि दूत द्वै आये । आचार्यन आगमन सुनाये ॥
 आगू लेन जान मन दयऊ । तेहि क्षण कार्य्य तीनि परि गयऊ॥
 ध्याय तबै मन अंतर्यामी । तीनि रूप ह्वैगे तहँ स्वामी ॥
 तीनहु कर्म कियो इक काला । कोऊ नहिँ जान्यो यह ख्याला॥
 पाछे भयो जबै निरजोसा । तब सब जानि कियो अपसोसा॥

दोहा—श्रीहरिभक्ति प्रभाव गुणि, अचरज गुन्यो न कोइ ।

ब्रह्मरंध्र ते प्राण तजि, गयो ब्रह्मपुर सोइ ॥ १ ॥

इति श्रीरामरसिकावल्यांकलियुगखंडेउत्तरार्द्धेद्वादशोऽध्यायः॥ १२ ॥

अथ रामानंदकी कथा ॥

सोरठा—रामानंद महान, भये भक्त यदुनाथके ।

तिन अख्यान सहसान, आदि अंतलों को कहै॥१॥

पीपा औ रैदास, नाऊसेन सुजान अति ।

अरु कबीर भवनाश धनाजाट इत्यादि बहु ॥ २ ॥

शिष्य चतुर्दश सति यहि भांती। इक इकते महिमा विख्याती ॥

तिनके शिष्यनकी जब गाथा । कहिहौं नाथ साधु पदमाथा ॥

तब रामानंदहि की महिमा । अपने ते प्रगटी यहि महिमा॥

पै कछु कथा कहौं सुखदाई । ताहि सुनो संतौ मन लाई ॥

किय अभक्त जनसो नहिँ भाषन। कियो भक्ति वर्षन जन राखन॥

वर्ष सप्तशत लौं तनु राख्यो । परमारथ तजि और नभाख्यो ॥
 तासु प्रभाव विदित चहुँ धाहीं । भरत खंड जानत को नाहीं ॥
 बांधवगढ़ इक दुर्ग हमारो । वरुणाचल तेहि वेद उचारो ॥
 तहँ बघेल वर वंश विशाला । वास करत अबलों सब काला ॥
 तहँको सेन नाम कोउ नाऊ । कहिहों आगे तासु प्रभाऊ ॥
 सोनापित इक समय सुजाना । पायो अस निदेश भगवाना ॥
 रामानंद शिष्य तुम होहू । मिटिहै तब माया मद मोहू ॥

दोहा—हरि अनुशासन पायकै, काशी कियो पयान ।

रामानंद समीपमें, कीन्ह्यों विनय बखान ॥ १ ॥

रामानंद शूद्र तेहि जानी । बैठे पट कवार कहँ ठानी ॥
 सेन समीप माहँ गे जबहीं । पट कवार टरिगो तहँ तबहीं ॥
 पुनि बाँध्यो पुनि टरयो तुरंतै । रामानंद गन्यो तेहि संतै ॥
 दौरि मिले भीतर लै गयऊ । सादर शिष्य करत तेहि भयऊ ॥
 शिष्य होन जबगे रैदासा । रामानंद कह्यो सहलासा ॥
 चर्मकारकी जाति तिहारी । शिष्य करैं किमि अहँ अचारी ॥
 जब शासन देहँ हरिमोको । करब शिष्य तबहीं हम तोको ॥
 अस कहि विदा कियो रैदासै । भोजन हित गे आप अवासै ॥
 पट कवार बान्धे चहुँ ओरा । देख्यो यह कौतुक तेहि ठोरा ॥
 लीन्हें सलिल खड़े रैदासा । तब लै जल बैठायो पासा ॥
 पट कवारको खोलि निहारा । दूरि बैठ रैदास उदारा ॥
 दौरि मिले हरिशसन जानी । कीन्ह्यो शिष्य सकल विधि ठानी ॥

दोहा—यहि विधि रामानंद के, अहँ चरित्र अनंत ।

कहँलौं मैं वर्णनकरो, जेहि अधीन भगवंत ॥ २ ॥

इति श्रीरामरसिकावल्यंकलियुगखंडेउत्तरार्द्धत्रयोदशोऽध्यायः ॥ १३ ॥

अथ अनंतानंदकी कथा ॥

दोहा—भक्त अनंतानंद को, अववणैआख्यान ।

संतन दानि अनंद जेहि, प्रणपाल्यो भगवान ॥ १ ॥

भक्त अनंतानंद सुजाना । भयो निधान ज्ञान विज्ञाना ॥
 रामनाम महँ वचन विहारा । राम सनेह पियूष अधारा ॥
 जोरचो रघुपति भक्त समाजा । कीन्ह्यो परउपकारहिं काजा ॥
 जेहिं जेहिं देशन कियो पयाना । तेहिं तेहिं पापन पुंज पराना ॥
 संभरदेश गये इक काला । तहँ को रह्यो अभक्त भुवाला ॥
 रह्यो अपूरव भूपति बागा । तापर रह्यो राव अनुरागा ॥
 बड़ बड़ आमरूदफलजाके । माली रह्यो दिवश निशि ताके ॥
 कोउ वैष्णव तहँ जाय निहारचो । स्वामी सों पुनि आय उचारचो ॥
 वीहीके फल सुखद महाना । लगे बाग महँ गुरु भगवाना ॥
 कोहु कहँ टोरन देत न माली । माँगेहु पर मुरके हम खाली ॥
 तबहिं अनंतानंद सुजाना । शिष्यन सों अस वचन बखाना ॥
 एकहु फल वीहीके बागा । नहिं रहिहैं अस मोहिंसतिलागा ॥

दोहा—तेहि क्षण निज जन पूर प्रण, करन सत्य भगवान ।

कियो बाग वीही रहित, कौतुक मच्यो महान ॥ १ ॥

पहुँचावन हित फलकी डाली । टोरन वीहीगो जब माली ॥
 तरुन रहित फल देख्यो जबहीं । भयो दुखी उपज्यो डर तबहीं ॥
 कह्यो कौन कारण यह भयऊ । बिन फल सकल बागहैगयऊ ॥
 तब कोउ अनुचर कह्यो बुझाई । सांधु एक आयो इत धाई ॥
 माँग्यो फल दीन्ह्यो हम नहिं । सो किय कौतुक यहि क्षण माहीं ॥
 तब माली खोजत चलि आयो । नाथ चरणमें शीश नवायो ॥
 भूपतिसों सब कह्यो हवाला । आयो द्रुतहि दौरि माहिपाला ॥
 निरखि अनंतानंद स्वरूपा । तुरतहिं भयो भक्ति युत भूपा ॥
 आय शिष्य भो यत परिवारा । सकल देश पुनि हुकुम प्रचारा ॥

भयो शिष्य तब सिगरो देशू । मिटत भयो भव केर कलेशू ॥
कह्यो अनंतानंद प्रसन्ना । भयो बाग पुनि फल सम्पन्ना ॥
राजा प्रजा भये गतिभागी । भव सम्भवित भूरि भव भागी ॥

दोहा—ऐसे अमित चरित्र जग, कियो अनंतानंद ।

कहँ लौं मैं वर्णन करौं, अहै मोरि मतिमंद ॥ २ ॥

इति श्रीरामरसिकावल्यांकलियुगखंडे उत्तराद्धे चतुर्दशोऽध्यायः १४

अथ नरहरिदासकी कथा ॥

दोहा—शिष्य अनंतानंदके, नरहरिदास सुजान ।

तासु कथा वर्णन करौं, अवशि अनंद निधान ॥ १ ॥

नरहरिदास भक्त इक भयऊ । कबहुँ सो जगन्नाथपुर गयऊ ॥
मंदिर भीतर प्रविश्यो जबहीं । करत दंडवत देख्यो सबहीं ॥
तब मन महुँ अस कियो विचारा । जब जाई भुवि शीश हमारा ॥
तबहूँ हैं दर्शन अवरोधू । क्षणभर विरह सनेह समोधू ॥
अस गुनि पद करि प्रभुकी ओरा । परे उत्तान लखत तेहि ठोरा ॥
पंडा यह अपचार निहारा । तेहि वसीटि बाहिरे निकारा ॥
तब जेहि दिशि डारयो तेहि काहीं । तहँ द्वार भो मंदिर माहीं ॥
पुनि पछीत महुँ ताको डारा । तहौं भयो हरि मंदिर द्वारा ॥
यात्री पंडा देखि प्रभाऊ । परे सबै नरहरिके पाऊ ॥
त्राहि २ क्षमिये अपराधा । धोखे महुँ दीन्ह्यो हम बाधा ॥
सो नहिं कीन्ह्यो हर्ष विषादा । यह हरिदासनकी मर्यादा ॥
ऐसे अहँ अनेक चरित्रा । हरिभक्तन के जगत पवित्रा ॥

दोहा—सोई नरहरिदास प्रभु, जाको सुयश प्रकास ।

जासु शिष्य जग विदित भो, स्वामी तुलसीदास ॥ १ ॥

इति श्रीरामरसिकावल्यांकलियुगखंडे उत्तराद्धे पंचदशोऽध्यायः ॥ १५ ॥

अथ भावानंदकी कथा ॥

दोहा—अब मैं भावानंद की कथा कहूँ रसखानि ।

जासु सुनत हरिदेत पुर, पकरि पाणिसोंपानि ॥ १ ॥

छंद—गये भावानंद जा,यकसमय तीरथराज ।

वसे मकर प्रयंत सँग विलसंत संत समाज ॥

न्हाइ पूरणमासिको अधरात कीन्ह पयान ॥

तरन हेत सु तरनिजा तद तरनिको चौआन ॥

कह्यो केवट हुकुमहाकिम तरनको निशि नाहिं ॥

गवन अवशि विचारि सुमिरचो श्रीनिवासहि काहिं ॥

सुमिरि हरिकोहिले पैदरयमुनमध्य दहार ॥

भयो जल तब जानु लों भे संत सिंगरे पार ॥

यह निराखि कौतुक सकल साधु अगाध आनंदपाय ॥

यश विमल भावानंद को दीन्ह्यो चहुं दिशिछाय ॥

यहि भांति भावानंद के हैं चरित विविध प्रकार ॥

मैं कियो वर्णन नहिं विशेष विचारि अतिविस्तार ॥

इति श्रीरामरसिकावल्यांकलियुगखंडेउत्तरार्द्धषोडशोऽध्यायः ॥ १६ ॥

अथ रामदास और सारीदासकी कथा ॥

दोहा—रामदास अरु दूसरो, सारीदासहि नाम ॥

शिष्य अनंतानंद के, भये गुगल मतिधाम ॥ १ ॥

हरि प्रेमी नेमी जग क्षेमी । रोजहि राम रास रुचि नेमी ॥

नवधा भक्ति विभेदविज्ञाता । भगवत्भक्ति विभेद अज्ञाता ॥

हरि चरणोदक नीर न जाना । हरि अवतार न गुन्यो समाना ॥

साधु मानप्रद आपु अमानी । उभय भक्त भे परम विज्ञानी ॥

एक समय विचरत सब देशा । चित्रकूट गे शुभग प्रदेशा ॥

।चत्रकूट दिशि पाश्चम ठामा । त्वरों नाम रह्यो इक ग्रामा ॥
तहँ के वासिनकी यह रीती । करैं साधुसों अवशि अनीती ॥
कबहुँ न करैं संत सत्कारा । ठाढ़ो होन न पाव दुवारा ॥
रामदास औ सारीदासा । गये ग्राम तहँ लखन तमासा ॥
देखत दूरि दूरि सब भाषे । ठाढ़हु होत माहँ अति माषे ॥
तब दोउ साधु ग्रामके दूरी । वसे नदी तट लहि दुख भूरी ॥
तेहि निशि ग्रामाधिप सुत काहीं । डस्यो भुजंग मरचो क्षण माहीं ॥

दोहा—भोर जरावन लै चले, गये जबहि सरि तीर ॥

तिनहि देखि दोउ साधु तहँ, बोले वचन गँभीर ॥१॥

जियहि जो सुत तौ देहु का, दीजै सत्यवताय ॥

जौन कहौ सो देहिहम, बोले सबै हहाय ॥ २ ॥

तब दोउ साधु कह्यो विहँसि, अस मय्यादा होय ॥

करहु सबै सत्कार तुम, संत जो आवै कोय ॥ ३ ॥

तब बोले सब ग्राम के, ऐहे जो हरिदास ॥

जो सुत जिये तौ करब हम, युत सत्कार सुपास ॥४॥

तब दोउ संत तुरंत उठि, यदुपतिको शिरनाइ ।

अपनो चरण छुवायकै, दीन्ह्यो सुतहि जिआइ ॥५॥

तबते त्वर्रा गाँवकी, अब लों ऐसी रीति ।

आवै जो कोउ साधु तहँ, करै ताहि अति प्रीति ॥ ६ ॥

इति श्रीरामरसिकावल्यंकलियुगखंडेउत्तरार्द्धसप्तदशोऽध्यायः ॥ १७ ॥

अथ पयहारीजीकी कथा ॥

दोहा—पयहारीजीको करौं, अब इतिहास प्रकास ।

जाहि सुनत समुझत सकल, हुलसत है हरिदास ॥१॥

जयपुर कछवाहन को ग्रामा । तहाँ रह्यो गालव मुनि धामा ॥
 सो गलता गादी कहवावै । संत समाज तहाँ सुख पावै ॥
 सो गद्दी महँ अति तपधारी । भयो एक हरि जन पयहारी ॥
 ताके शिष्य महा परभावा । एक ते एकन महत्व बढ़ावा ॥
 तिनकी कथा कहौ गो आगे । पयहारी यश सुनहु सुभागे ॥
 गलता गादी प्रभु पैहारी । भयो सकल संतन सुखकारी ॥
 सहसन संत करें तहँ वासा । सबको अतिशय होत सुवासा ॥
 एक समय पयहारी दासा । कांचीके स्वामी के पासा ॥
 नेवता हित द्वै संत पठायो । कांचीके स्वामी सुख पायो ॥
 स्वामी तबै करन व्यवहारा । शुभ मुद्रा शत पंच पवारा ॥
 वैष्णव मुद्रा लै द्रुत धाये । जब जैपुर बजार मधि आये ॥
 यक गणिका स्वरूप लखि मोहे । धनहु आपने ढिग महँ जोहे ॥

दोहा—वारवधू सों कह विहँसि, मुद्रा लै शत पांच ॥

चारि दंड बीते निशा, देहु हमैं सुख सांच ॥ २ ॥

वारविलासिनि गुनि धनवाना । कीन्ह्यो तिनको वचन प्रमाना ॥
 साधु गये जब अपने डेरा । चारि दंड निशि गइ भइ बेरा ॥
 मोहित मदन वार तिय गेहू । चले संग धन धरि भरि नेहू ॥
 पयहारीके मंत्र प्रभाऊ । तिनको धन कुपंथ किमि जाऊ ॥
 देखि परचो नहिं गणिका गेहू । फिरे सकल निशि भरि संदेहू ॥
 उतै वारतिय अवधि व्यतीते । हेरन चली मानि दुख जीते ॥
 सोऊ चारि पहर निशि वाग्यो । संत खोज कतहूँ नहिं लाग्यो ॥
 भटकत भोर भये भै भेटा । उपज्यो ज्ञान मदन भय मेटा ॥
 धिक्धक्कियो संत निज काहीं । हाय कौन गति भै क्षण माहीं ॥
 तहँ सत्संग प्रभाव विशेषी । गणिकहु अधम आप कहँ लेषी ॥
 चलन लगे जब संत दुखारी । गणिका तब अस गिरा उचारी ॥

लाखनको धन है मम गेहू । देहों संतन विन संदेहू ॥

दोहा—लै चलिये मोहिं प्रभु निकट, कीजै मम उद्धार ॥

विषय विवश मैं विविध विधि, भुगत्यों दुख संसार ३

गणिकाको अति शुद्ध लखि, लीन्ह्यो संत लेवाय ॥

कपट छांड़ि निज गुरु निकट, दिय वृत्तांत बताय ४

पयहारी परसन्न है, गणिकै लियो टिकाय ॥

हरि सन्मुख किय नृत्य सो, लिय गति विषय विहाय ॥

सुनहु संत दूजो चरित, पयहारी जीकेर ॥

वर्णत जाहि न होत है, मन संतोष धनेर ॥ ६ ॥

पयहारी जी उत्तर ओरा । गये करन तप नंदकिशोरा ॥

गुहा बैठि यक ध्यान लगाई । यहि विधि दिय कछु काल विताई

यक अहीरमहिषी बहुल्यावै । गुहा निकट महँ रोज़ चरावै ॥

धरचो कमंडलु जहँ पयहारी । तहँ यक महिषी सपदि सिधारी ॥

तेहि परथन करि ठाढ़ी होती । भरत कमंडलु पयकी सोती ॥

यहि विधि बीति गयो चौमासा । यक दिन लख्यो अहीर तमासा ॥

पयहारी को दर्शन पायो । दौरि तासु चरणन शिरनायो ॥

पयहारी जी कह अस बैना । तेरी भैंस दियो मोहिं चैना ॥

मांगुमांगु वर जो मन होई । कह्यो अहीर सुनहु प्रभु सोई ॥

दूध पूत दिय दैव हमारे । नहिं आशा अब दया तुम्हारे ॥

पै मम भूपति है धनहीना । धनी होत सो तुम्हारो कीना ॥

भये प्रसन्न तबहि पयहारी । कह्यो धन्य तैं गिरा उचारी ॥

दोहा—स्वारथ वश सिगरो जगत, पर उपकार विहीन ॥

पर उपकार प्रवीन जे, तेई मनुज प्रवीन ॥ ७ ॥

मेघ वृक्ष सरि सत्य सपूती । परहित हेतु होति करतूती ॥

जिनको तन मन धन पर हेतू । तेई मनुज मनुजकुल केतू ॥

परहित होती संत विभूती । निज हित होती खलन कुपूती ॥
 अस कहि पयहारी पठवायो । सो अहीर अवनीपति ल्यायो ॥
 राजा गह्यो आय युग पादा । पयहारी दिय आशिर्वादा ॥
 तबते धरा धान धन पूरी । राज्यभई नहि संपति झूरी ॥
 राजा संतन विविध खवायो । हरिमंदिर अनेक बनवायो ॥
 करत कृष्ण कीर्तन दिन जाहीं । एकहु क्षण नहि जात वृथाहीं ॥
 कृष्ण निवेदित भोजन करहीं । गाय गाय हरिगुण सुख भरहीं ॥
 एक दिवस राजा हरिसेवी । मँगवायो हरिहेत जलेवी ॥
 नृप बालक ताको कछु खायो । राजा शिर काटनको धायो ॥
 बच्यौ भागि हरि मंदिर माहीं । नृप कह मुख देखब हम नाहीं ॥

दोहा—संत आय तब विनय करि, क्षमा करायो खोरि ।

राजा दै धन मोल जिय, तबसे बच्यो बहोरि ॥ ८ ॥

कुल्लूनगर मही अमर, जूता बेचन लाग ।

दै सम्पति हटक्यो नृपति, इमि ब्रह्मग्य अदाग ॥ ९ ॥

संत भोज यक दिन भयो, नृपसुत परुसन लाग ।

गर्भवतिहँ द्वै पातरी, परस्यो भरि अनुराग ॥ १० ॥

पयहारी परभावते, अस नृप भयो प्रवीन ।

नहि संतन आश्चर्य कछु, द्रवत सदा जे दीन ॥ ११ ॥

इति श्रीरामरसिकावल्यांकलियुगखंडेउत्तरार्द्धेअष्टादशोऽध्यायः ॥ १८ ॥

अथ कीलदासकी कथा ॥

दोहा—श्रोता सुनहु सुजान सब, कीलदास इतिहास ।

जाहि सुनत उर तम हरत, संत प्रभाव प्रकास ॥ १ ॥

अहै देश पश्चिम गुजराता । तहँ यक खत्री मति अवदाता ॥

सो कीन्ह्यो हरि महँ अनुरागा । ताते भयो जगत् बड़भागा ॥

शाह समीप लग्यो रोजगारू । तासु कृपा भो विभव अपारू॥
 सूबा भयो देश गुजराता । सुमिरत नित हरिपद जलजाता ॥
 विभव विवश नहिं सुमिरन त्यागा । करै कांज हरिमहँ मन लागा
 नाम सुमेरु देव जग जाको । धर्म धुरंधर भो बसुधाको ॥
 तासु पुत्र यक भयो सुजाना । तब विरक्त ह्वै तज्यो मकाना॥
 परमहंस ह्वै विचरन लाग्यो । हरि सुमिरत बहु देशन वाग्यो॥
 भयो शिष्य पयहारी जीको । किये कृपा तापर पिय सीको ॥
 एक समय दिल्लीपुर आयो । शिला बैठि हरि ध्यान लगायो॥
 कढ्यो शाह तेहि मारग ह्वैकै । कियो सलाम सकल जन ज्वैकै॥
 सो ब्रह्मांड निरखि निज प्राना । बादशाहको भयो न भाना ॥

दोहा—शाह निरखि तेहि जानि जड़, करिकै कोप प्रचंड ।

कह्यो प्रवेशहु शीशमें, यक मम आयसडंड ॥ १ ॥

सेवक सुनत तैसही कीन्ह्यो । ताके शीश कील द्रुत दीन्ह्यो॥
 हरिप्रभाव आयस गलि गयऊ । ताको कछू भान नहिं भयऊ ॥
 बादशाह लखि संत प्रभाऊ । तजि घमंड पकरचो युग पाऊ॥
 तबते कीलदास भो नामा । कियो कोप नहिं सुमिरत रामा॥
 एक समय जयपुर नृप केतू । आयो मथुरा मज्जन हेतू ॥
 कीलदासको सुनि अवनीशा । जाय कियो निज पद तिन शीशा
 मानसिंह रह जाकर नामा । जाको विप्र हेतु धन धामा ॥
 लग्यो करन संभाषण राजा । मान्यो अपनेको कृतकाजा ॥
 कीलदास ताही क्षण मारी । खड़े भये करि भुज नभ काहीं॥
 बार बार कह मुख स्यावासू । कियो सत्य पितु विष्णु विश्वासू॥
 सचकित मानसिंह तब बोलो । यह लीलाका कारण खोलो ॥

दोहा—कीलदास तब कहत भे, रह्यो पिता गुजरात ।

सो तनु तजि हरिधाम को, चढ़ि विमान अब जातर॥

नृप मन गुनि आश्चर्य अपारा । गुर्जर पठयो सुतर सवारा ॥
 सोलै खबरि तुरंतहि आयो । कीलदास कह तस सो गायो ॥
 राजा भयो समासृत तबहीं । मान्यो मोद संत जन सबहीं ॥
 कीलदास यक समय तहाँहीं । सुमन लेन गे उपवन माहीं ॥
 सुमन लेत काट्यो अहि हाथा । रह्यो न कोउ तिनके तहँ साथी ॥
 कीलदास तब कियो विचारा । धौं यह कारो अति विषवारा ॥
 धौं मम तनु कारो विष छायो । कौन होत यहि क्षण अधिकायो
 लेन परीक्षा हाथ पसारा । डस्यो बहुरि अहि बारहिवारा ॥
 चढ्यो न विष नेकहु तनु ताके । सुमिरत पति वृषभान सुताके
 ऐसो कीलदास इतिहासा । मति लघु कहँ लगि करों प्रकासा ॥
 कीलदास यमुना तट बैठे । यदुपति प्रेम पयोनिधि पैठे ॥
 ब्रह्मरंध्र ह्वै करि निज प्राणा । किय गोलोक तुरंत पयाना ॥
 दोहा—कीलदासकी यह कथा, मैं वरण्याँ सुख छाय ।

और अमित तिनके चरित, को कहि पारै जाय ॥३॥

इति श्रीरामरसिकावल्यंकलियुगखंडे उत्तरार्द्धेनवदशोऽध्यायः ॥ १९ ॥

अथ अग्रदासकी कथा ।

दोहा—श्रोता सुमति सुजान सब, अब अतिशय चित लाय ॥

अग्रदासकी अति अमल, सुनहु कथा शिरनाय ॥३॥

छप्पयनाभाकृत—सदाचार ज्यों संत प्रात जैसे करि जाये ॥

सेवा सुमिरण सावधान राखव चित लाये ॥

प्रासिधि बाग सों प्रीति हव्यकृतकरतनिरंतर ॥

रसना निर्मल नाम मनहुँ वर्षत धाराधर ॥

कृष्णदास कृपा भक्ती मन वच क्रमकियो ॥

श्रीअग्रदास हरिभजन विन काल वृथा नहिंचितदियो

दोहा—नाभाकृत छप्पय यही, लिख्यो यथावत जोय ।

संत कथा आचार्य गुनि, बंदौं मन मुद मोय ॥ १ ॥

अग्रदास गलताके गादी । भयो अधीश धर्म मय्यादी ॥
 मानसिंह जैपुरको राजा । सो अपनी लै सकल समाजा ॥
 अग्रदास गुरु आज्ञाकारी । रहै समीप चरण रज धारी ॥
 एक समय तीरथके हेतू । अग्र चल्यो बहु संत समेतू ॥
 पथ महँ रह्यो वाणिक कर बागा । निरखत अग्रदास मन लागा ॥
 तहां वास कीन्ह्यो तेहि राती । सुन्यो सो आई संत जमाती ॥
 आय कियो संतन सत्कारा । दीन्ह्यो भोजनविविधप्रकारा ॥
 तापर संत प्रसन्न भये सब । अग्रदास कह जाहु भवन तब ॥
 वाणिक बंदि पदगृह निजआयो । तेहि निशि तेहि सुतसर्पसतायो
 डसत भुजंग गयो मरि सूना । तेहि घर भयो दुसह दुखदूना ॥
 अग्रदास यह सुन्यो हवाला । आये वाणिक भवन तेहि काला
 संत चरणकी लाल पियाई । दियो वाणिक सुत तुरतजियाई
 दोहा—जय जय कार भयो नगर, तहँ को सुनि नरनाह ॥

भयो शिष्य परिकर सहित, लै अग्रहि गृहमाह ॥ २ ॥

पुनि तीरथयात्रा बहु कीन्ह्यो । भवन जवनमोदितचितदीन्ह्यो
 अग्रदास अरु कीलदास दोउ । एकसमै लीन्हो न संत कोउ ॥
 मज्जन करि गवने घर माहीं । लख्यो अंध यक बालककाहीं ॥
 सो शिशु लांगूली द्विजकेरो । कबहूँ पन्यो अकाल वनेरो ॥
 ताकर माता तेहि थल त्यागी । गई पराय अन्न अनुरागी ॥
 पूछ्यो अग्रदास शिशु काहीं । को तुम इत अकेल पथमाहीं ॥
 शिशुकह जननी मोहि विहाई । गई क्षुधा वश अनत पराई ॥
 अग्रदास कह मातु धिकारा । तब बालक यह वचन उचारा ॥
 नाहिं जननी कर दोष गोसाईं । प्रभुहि तजत प्राकृतकी नाई ॥

सुतविरंचि वारिधिपितु जोई । भगनी रमा विष्णु बहनोई ॥
 तौन कमल कह हनै तुषारा । करै सहायन अस परिवारा ॥
 दोहा-ऐंचि कमंडलु ते सलिल,दियो दृगन महँ मारि ॥

अमल कमल दल सम नयन,प्रगटे विमल निहारि ॥३॥
 पन्यो चरण बालक तब रोई । गयोचित्त करुणा रस मोई ॥
 निज आश्रम बालक कहँ लाये । यहि विधि भोजन पान बताये ॥
 संत चरण जल कीजै पाना । भोजन साधु उछिष्ट प्रमाना ॥
 सार्ध कोटि त्रय तीरथ जगमें । ते सब हरिदासनके पगमें ॥
 कोटिहुँ अंश चरण जल काहीं । वेद वदत तूलत कहँ नाहीं ॥
 कोटि जन्मके पातक भारे । ज्ञात और अज्ञात अपारे ॥
 साधु जूठ भोजन मुख डारत । सबै परातन फेरि निहारत ॥
 साधु जूठ पग सलिल प्रभावा । हिये विराग ज्ञान प्रगटावा ॥
 अग्रदास हरि नाम सुनायो । नाभा नाम गुरू सों पायो ॥
 सेवत संत चरण तहँ नाभा । प्रगटी विमल तासु तब आभा ॥
 रहन लग्यो गलता महँ सोई । मान्यो भक्त प्रबल सब कोई ॥
 अग्रदास एक समय सुजाना । लग्यो करन रघुपति कर ध्याना ॥
 दोहा-तासु शिष्य एक साहु रह, करन हेतु व्यवहार ।

जात जहाज चढो चलो, मधि कहँ पारावार ॥ ४ ॥
 तेहि क्षण बूढ़न लागी नाऊ । सो सुमिरचौ गुरुपद परभाऊ ॥
 सो इत अग्रदास सब जान्यो । तेहि रक्षणको चित डुलसान्यो ॥
 जब रक्षण को कियो विचारा । वणिक नाव तब लगी किनारा ॥
 अग्रदास जब लों किय रक्षण । राम ध्यान छूट्यो तबलों क्षण ॥
 दूरि बैठि नाभा तहँ रहे । विजन करत डोरी कर गहे ॥
 संत चरण सेवन परभाऊ । नाभाको नाहिँ भयो दुराऊ ॥
 गुरु वृत्तांत जानि अस गायो । नाथ नाव वह भलेबचायो ॥

अब तो सिंधु तीरगइ नाऊ । पुनि ध्यावहु रघुकुलमणिराऊ ॥
 ऐसे अग्रदास सुनि वैना । बोल्यो चकित खोलि युगनैना
 यहि क्षणको यह वचन प्रकासा । नाभा कह्यो नाथ तुव दासा ॥
 अग्रदास नाभा कहँ जानी । बारबार कह वचन बखानी ॥
 सेवत साधु शक्ति भै तेरी । जानन लाग्यो गति मन केरी ॥
 दोहा—ताते अब तू संत को, कीजै चरित बखान ।

वर्णन संतचरित्र ते, परगति हेतु न आन ॥ ५ ॥

नाभा कह्यो सुनहु गुरुज्ञानी । यह तो कठिन परत मोहिं जानी
 संतभाव दुस्तर जग माहीं । यक इतिहास कहौं तुम पाहीं ॥
 कहूँ द्वै साधु चले मग जाते । लखे मूर्ति हरि प्रगट शिला ते ॥
 बनमें तापर रही न छाया । चहुँकित जामी तृणसमुदाया ॥
 द्वै में एक लग्यो पछिताना । सहत शीत आतप भगवाना ॥
 दूजो चलोग्यो कहूँ दूरी । ठहरि गयो तहँ यकरति भूरी ॥
 तेहि मूरति पर बहु तृणकारी । रच्यो कुटी बहु पत्रन पारी ॥
 करिकै कुटी गयो चलि सोई । दूजो लौख्यो मारग ओई ॥
 कुटी निरखि हरि मूरति पाहीं । गारी दीन्ह्यो करता काहीं ॥
 दोऊ संतभावके सांचे । दोऊ निज निज हेतु निरांचे ॥
 आतप वात वरष यक वारचो । यक दवारिकी भीत विचारचो ॥
 उकुसि कुटी तेहिं क्षण तृण काटी । मूरति चहुँ कित पाथर पाटी ॥
 देइ लगाय दवारि न कोऊ । अस कहि गयो कहूँ पुनि सोऊ

दोहा—देखिय दोहुन संत कर, हरिमें भाव अपार ।

कौन भांति संतन चरित, वराणि पाइहौं पार ॥ ६ ॥

अग्रदास बोले वचन, सुनु नाभा चितलाय ।

भक्ति किये भगवंतकी, दुस्तर सरल देखाय ॥ ७ ॥

तौन भक्तिके रूप मैं, अनुसाधन शुभ रीति ।

तुमको देत सुनाय मैं, होति जाहि सुनि प्रीति ॥८॥

कवित्त-भक्ति तरु पौधा ताहि विघ्न डर छेरीहूं को वारिदे वि-
चारीवारि सींच्यो सतसंग सों॥ लगेई बढन गोदा चहुँदिशि क
ठिनसो चढन अकाम यश फैल्यो बहु रंग सों॥ संत उर आलवाल
शोभित विशाल छाया जिये जीव जाल ताप गये यों प्रसंग सों॥
देखो बडवार जाहि अजाहूं की शंका हुती, ताहि पेट बांधे फूलें
हाथी जीते जंग सों ॥ १ ॥ श्रद्धाई फुलेल उपटनो श्रवणन कथा
मैल अभिमान अंग अंगन छुटाइये ॥ मनन सुनीर अन्हवाय
अंगुछाय दया, नवन वसन पन सोधो लै लगाइये॥ आभरण नाम
हारिसाधु सेवा कर्णफूल, मानसिक नथ अंजन लगाइये ॥ भक्ति
महरानी को श्रृंगार चारु वीरी चाह, रहै जो निहारि लहै लाल
प्यारी गाइये ॥ २ ॥

ऐसी गुरु आज्ञाको पाई । नाभा तुरत भक्तिरस छाई ॥
ज्ञान विज्ञान विराग विधाना । पाय तुरत त्रैलोक देखाना ॥
कछुक काल महँ अग्र विज्ञानी । गवने विपिन घोर अति जानी॥
तब गादी हित झगरो माचो । सकल संत जु रि किय मतसाचो॥
अग्रदासके शिष्य घनेरे । लिखि २ पत्र नाम सब केरे ॥
प्रभु के आगे सो धरि दीजै । जेहि आज्ञा तेहि मालिक कीजै॥
तैसे कीन्हे संत अपारा । कटि आये करि बंद केवारा ॥
कछुक काल महँ खोल्यो जाई । नाभा नाम सही लिखि पाई ॥
तब नाभाजीको दिय गादी । भये संत सिंगरे अहलादी ॥
माचि रह्यो सब थल जयकारा । नाभा सांचो संत अपारा ॥
तासु प्रभाव रह्यो चिरकाला । रच्यो मनोहर भक्तन माला ॥
चारिहु युगके संत गनायो । तिनके सकल चरित्रन गायो ॥

दोहा-पुनि संतन पग पांवरी, धरि अपने उर शीश ॥

तारे सागरसंसार गो, जहँ रघुकुलको ईश ॥ ९ ॥

मानसिंह राजा कछवाहा । जैपुर को अधीश अरिदाहा ॥
 अग्रदासको शिष्य सुजाना । तासु चरित कछु करौं बखाना ॥
 मानसिंह एक समय सिधायो । सतसँग हित नाभा ठिग आयो
 वचन कह्यो मन माहँ सुखारी । हरिगुरु अग्र कृपानिधि भारी ॥
 तिनके शिष्य सहस्र सुजाने । पै मोहिं सो भानत नहिं आने ॥
 नाभा कह्यो सबैको मानै । राजा रंक रीति नहिं जानै ॥
 मानसिंह तब कह अस वाता । अबै वाग महँ गुरु विख्याता ॥
 हमहुँ तुमहुँ तहँ चलैं सिधारी । प्रथम दरश लह सोइ प्रिय भारी
 अस कहि नाभा अरु नृप माना । कियो वाटिकै तुरत पयाना ॥
 अग्रदास हरि हित सुम टोरत । कह्यो वाग बाहेर दल जोरत ॥
 इतै भूप दल रुक्यो दुवारा । मारग बंद भयो तेहि वारा ॥
 भूप अकेल वाटिका गयऊ । तहँ गुरुको नहिं देखत भयऊ ॥

दोहा—इतै गुरू लखि भीर अति, निकसि बाग ते जाइ ॥

बैठि इकांतहि तहँ गयो, नाभा दरशन पाइ ॥ १० ॥

मानसिंह पुनि गयो तुरन्ता । वंद्यौ चरण गुरू भगवंता ॥
 नाभाके पद पुनि शिरनायो । कह्यो तुमहिं गुरु अधिक बनायो ॥
 एक समय दश सहस्र सवारा । मानसिंह नृप लै पगु धारा ॥
 अग्रदास के दरशन हेतू । गुरु दरशन किय मोद निकेतू ॥
 दश कदलीफल गुरु तेहिं दीन्ह्यो । सादर पद वंदन करि लीन्ह्यो ॥
 दीन्ह्यो गुरु पुनि दश फल नाभै । करहु सकल दलके फल लाभै
 मानसिंह तब अचरज मानी । चलयो भवन मति विस्मय सानी ॥
 पूछ्यो कालिह फौज महँ आई । गयो कौन कदली फल पाई ॥
 सबै रहे दश फलको लीन्हें । कहत भये नाभा यह दीन्हें ॥
 मानसिंहको पुनि एक काला । मन्यो महाप्रिय नाग विशाला ॥
 अतिशय विमन तबै नरनाहा । नाभा हित गो विगत उछाहा ॥

नाभा तासु देखि दुचिताई । तुरत जाय गज दियो जियाई ॥

दोहा—नाभाके अरु अग्रके, यहि विधि चरित अपार ॥

मान महीपतिके तथा, को कहि पावै पार ॥ ११ ॥

अथ प्रियादास की कथा ॥

अब वरणौं प्रियदास चरित्रा । भक्तमाल किय तिलक विचित्रा
प्रियादास यक संत प्रधाना । शिष्य मनोहर दास सुजाना ॥
तेहिं किय साधु चरण अति प्रेमा साधु सेव तजि द्वितिय न नेमा ॥
एक समय तीरथको गवने । साधु समाज सहित अब दबने ॥
एक देश महँ रह यक साहू । सो कीन्ह्यो दरशन उतसाहू ॥
प्रियादास पद बंध्यो आई । कछु मोहर पुनि दियो चढ़ाई ॥
होत रहै तहँ भक्तन माला । सुनत साहु अति भयो निहाला ॥
प्रियादासको विनय सुनाई । हरि सन्मुख मोहिं देहु कराई ॥
प्रियादास कह सुनहु उपाई । प्रथम जानु संतन सेवकाई ॥
दूजो हरि कीर्तन मुख गाना । तीजो चरित सुनै भगवाना ॥
यहि ते बढै राम अनुरागा । तब उपजै विज्ञान विरागा ॥
तब छूटै जनको संसारा । और यतन नहिं मोर विचारा ॥

दोहा—साधु कह्यो मैं अधम अति, बहुत करों व्यापार ॥

सावकाश पाऊं नहीं, गृह महँ एकहुवार ॥ १२ ॥

पै यक मम उद्धार उपाई । सो तुम्हरे कर में दरशाई ॥
भक्तमाल मोहिं देहु दिखाई । सो पुस्तक मोहिं देहु धराई ॥
मरण समय हमरो जब आई । तब पुस्तक उर लेब धराई ॥
तब छूटी यमकी सब भीती । जाहुँ बैकुंठ यही परतीती ॥
एक भक्त समरथ गतिदाता । यामें भक्त अनंत विख्याता ॥
प्रियादास सुनि साहु गिराको । प्रेमित कियो सजल नयनाको ॥
कह्यो प्रशंसि साहु कहँ वानी । भक्तमाल पुस्तक ले ज्ञानी ॥

तेरो भक्तन महुँ विश्वासा । कबहुँ न होई यमकी त्रासा ॥
अस कहि पुस्तक दियो लिखाई । साहु गयो घर आनँद पाई ॥
मरण काल जब ताकर आयो । यमके दूत भीति दरशायो ॥
तब उर पुस्तक लियो धराई । गे यमदूत तुरंत पराई ॥
तब पुत्रन सों साहु सुखारी । कहत भयो अस गिरा उचारी ॥

दोहा—भक्तमाल परभाव ते, मैं वैकुंठहि जात ॥

यमके दूत पराय गे, हरिके दूत दिखात ॥ १३ ॥
जबहिं मरै कोऊ घर मारी । तब धरिके उर पुस्तक काहीं ॥
तुमहुँ सबै वैकुंठ सिधारेहु । अब नहिं आन उपाय विचारेहु ॥
अस कहि साहु गयो परधामा । पुत्रहु कीन्ह्यो तैसहि कामा ॥
तेऊ किय हरिलोक वसाऊ । देखहु भक्तमाल परभाऊ ॥
एक नगर महुँ सो प्रियदासा । आयो संतन सहित हुलासा ॥
तहुँ एक मंदिर रह्यो उत्तंगा । कीन्ह्यो वास सहित सतसंगा ॥
तेहि मंदिर महन्त एक रहेऊ । प्रियादास सों अस सो कहेऊ ॥
भक्तमाल प्रभु देहु सुनाई । फिरि जैयो अनतै चितलाई ॥
प्रियादास तब अति अनुरागे । भक्तमाल तहुँ बांचन लागे ॥
भीर भई तहुँ साधुन केरी । तीनि दिवस भै कथा घनेरी ॥
तिसरे दिवस चोर निशि आई । ठाकुर पुस्तक लियो चोराई ॥
प्रियादास तब अति दुख भीने । तीनि पहर भोजन नहिं कीन्हे ॥

दोहा—तब हरि को संकठ गयो, चोरन कीन्ह्यो अंध ॥

उरमें दीन्ह्यो ज्ञान कछु, आन दीनके बंध ॥ १४ ॥
सिगरे चोर ज्ञान जब पाये । तब अनेक बाजन बजवाये ॥
ठाकुर अरु पुस्तक करि आगे । चले प्रियादासै पद लागे ॥
मिट्टी अंधता तब तिन केरी । हरिमें प्रगटी प्रीति घनेरी ॥
ठाकुर पुस्तक दिय चलि आई । संत समाजहि बजी वधाई ॥

पुनि प्रियदास तीर्थहित गवने । कछु दिन महुँ आये तेहि भवने ॥
 कह्यो संत तब सब कर जोरी । भक्तमाल बांचहु सुख वारी ॥
 प्रियादास तब विस्मय कीन्ह्यो । कथा प्रबंध राखि कहँ दीन्ह्यो ॥
 प्रभुमंदिर ते वचन प्रकासा । कथा प्रबंध लग्यो रैदासा ॥
 प्रियादास कह को यह भाष्यो । उत्तर कोउ न देन अभिलाष्यो ॥
 सो वाणी हरिकी पहिचानी । जय जयकार कियो सुख मानी ॥
 करि समाप्त पुनि भक्तन माला । प्रियादास ध्यावत नँदलाला ॥
 वृंदाविपिन विनोदित आये । तहुँ सब संतन शीश नवाये ॥
 दोहा—तहुँ यदुपतिपदकंज महुँ, मन करि अमल मिलिद ॥

चढ़ि विमान गोलोकको, भयो तुरत वासिंद ॥ १५ ॥

इति श्रीरामरसिकावल्यांभक्तमालकलियुगखंडेउत्त ०विंशोऽध्यायः ॥

अथ केवलदासकी कथा ॥

दोहा—केवलदास कथा कहौं, श्रोता सुनहु सुहाय ॥

जासु दया वारिध विशद, पारपाय को जाय ॥ १ ॥

केवलदास संत यक रहेऊ । तीरथ गवन करन चित चहेऊ ॥
 मारग महुँ यंक मिल्यो किसाना । वृषभ लिये बहु कियो पयाना ॥
 सो वृषभै मारचो यक लाठी । कछुदाया नहिँ कियो कुपाठी ॥
 उतै बैलके लग्यो प्रहारा । लखि केवल गयो खाय पछारा ॥
 देखत दौरि सकल जन आये । पूछन लागे कौन सताये ॥
 केवल कह्यो हन्यो वृष काहीं । लाठी लगी पीठिमम माहीं ॥
 केवल पीठि लखे जन जबहीं । लाठी उपटी देखे तबहीं ॥
 धन्य २ अचरज सब माने । दयारूप तिनको जिय जाने ॥
 वृषभै लखत दया अधिकाई । सो प्रहार उपत्यो तनुआई ॥
 वृषभै भई न तनकौ पीड़ा । दया मानि लखि माने ब्रीडा ॥
 देखि दशा यह उहै किसाना । त्राहित्राहि करि अतिहिँ डेराना ॥

केवल चरण गिरयो उत धाई । करहु नाथ अपराध क्षमाई ॥

दोहा—केवलदास किषान कृत, कछु न गन्यो अपराध ।

वसहि जासु हिय असि दया, तेहि यमकी नहि बाध ॥

इति श्रीरामरसिकावल्यांभक्तमालकलियुगखंडेएकविंशोऽध्यायः २१ ॥

अथ चरणदासकी कथा ॥

दोहा—अब हुलास भरि कहत हौं, चरणदास इतिहास ।

सुनतहि रमा निवासमें, अचल होत विश्वास ॥ १ ॥

सो अनन्य हरिको जन ठयऊ । संतन भेद भाव नहिं भयऊ ॥

संतनको पूजन नित करहीं । धूप दीप चंदन नित धरहीं ॥

संतनको नैवेद्य लगावै । तब आपहु परसादी पावै ॥

पंगु संत यक समय निहारा । वसिलत मम महँ जात सिधारा ॥

दौरि ताहि निज आश्रम ल्याये । करि पूजन अति आनंद छाये ॥

करत परश भे सुंदर पाऊ । रेंगन लग्यो साधु भरि चाऊ ॥

चलत चरण सो तीरथ गयऊ । चरणदास यश जग महँ छयऊ ॥

श्रोता देखहु संत प्रभाऊ । परशत चरण पंगु चल पाऊ ॥

यहि विधि चरणदास हरि दासा । बहुत काल लागि कियो विलासा ॥

अंत समय जब तज्यो शरीरा । तब पठ्यो पार्षद रघुवीरा ॥

तिनको प्रगट्यो गमन प्रकासा । जन प्रत्यक्ष यह लखेतमासा ॥

निरखि तासु दुख भये दुखारी । लगे चरण चापन सुखकारी ॥

दोहा—चरणदास वैकुण्ठको, गवन कियो यहि भांति ॥

बाल काल ते अंत लागि, सेयो संत जमाति ॥ २ ॥

इति श्रीरामरसिकावल्यांकलियुगखंडेद्वाविंशोऽध्यायः ॥ २२ ॥

अथ हठीदासकी कथा ॥

दोहा—हठीदासकी कहत हौं, कथा मोदकी धाम ।

जा मुख ते निकस्यो सदा, एक रामको नाम ॥ १ ॥

भोजन पान शयन मग जाता । वागत बैठत सांझ प्रभाता ॥
 खेलत हँसत रुदत दुख सुखमें । राम नाम निकसत नित मुखमें
 जब जब मुखते वचन बखाना । राम भाषि भाषै पुनि आना ॥
 यही परचो हठ हठी दासको । राम विश्वास निराश आशको ॥
 एक समय कहु रामत माहीं । परचो अकेल रह्यो कोउ नाहीं ॥
 लागी प्यास महादुख लहेऊ । राम कहनको कोउ नहिं रहेऊ ॥
 तृषावंत बीतत दिन भयऊ । अपनो नेम न त्यागत भयऊ ॥
 परचो रामको संकट भारी । आये तहाँ विप्र तनु धारी ॥
 तिनहि देखि बोल्यो मुख रामा । सोऊ कह्यो रामको नामा ॥
 हठीदास कीन्ह्यो जलपाना । तब ब्राह्मण भो अंतर्द्वाना ॥
 यही नेमको नाम कहावै । अस निरवाहै सो गति पावै ॥
 नेम निवाहक हैं रघुवीरा । सोई हरैं संतकी पीरा ॥
 दोहा—हठीदासके नेम कस, कौन करै जग नेम ॥

हरिको तहँ प्रगटन परचो, जानि दासको प्रेम ॥२॥

इति श्रीरामरसिकावल्यांकलियुगखंडेत्रयोविंशोऽध्यायः ॥ २३ ॥

अथ नारायणदासकी कथा ॥

दोहा—अब वरणों मैं चरित जो, किय नारायणदास ।

कियो भावना ध्यान में, सो प्रगटचो अयास ॥

छंद—सो कियो संतन प्रीति परम प्रतीति पद रजशिरधरचो
 इक समय बदरी वन गयो वन मध्य झूला तहँ परचो
 लखि भीर मनुजनकी तहाँ नहिं कढ़नको अवसर लह्यो
 यहि पारमें तब बैठि कीन्ह्यो भावना नहिं कछु कह्यो ॥
 द्वै दंडमें नयनन उधारचो भये झूला पारहैं ॥

यह देखि अचरज जानि यात्री कियो नति बहु बारहैं ॥

पुनि गये वदरीवन विलोक्यो ॥ १६ ॥ नारायण ॥
 कछु काल वसि करि योग त्याग्यो तनु पढ़तरामायणै॥
 दोहा—नारायणमें प्रेम करि, नारायण की आस ।
 नारायणके धाम गो, नारायणको दास ॥ १ ॥

इति श्रीरामरसिकावल्यांकलियुगखंडे उत्तरार्द्धे चतुर्विंशोऽध्यायः २४ ॥

अथ सूरदासकी कथा ॥

दोहा—वरणों सूरजदास को, अब सुंदर इतिहास ।
 रवि मंडलमें राम को, कियो ध्यान सहलास ॥

सूरजदास अनन्य उपासी । पूजत रविमंडल सुखरासी ॥
 विन रवि मंडल दर्शन पाये । कियो न पान अन्न नहिं खाये
 यहि विधि बीतिगयो बहु काला । विचरै जग जन करत निहाला
 एक समय भादोंके मासा । घेरयो वनमंडल आकासा ॥
 भई वृष्टि कछु वरणि न जाई । रविमंडल नहिं परचो दिखाई ॥
 तेहि दिन जानेसंत जमाती । आजु करौं भोजन केहिं भांती ॥
 सूरजदास उख्यो तब आसू । लग्यो करन पूजन सहलासू ॥
 ताकर नेम जानि भगवाना । प्रगटायो परभाव महाना ॥
 फूटि गयो वनमंडल घोरा । रविप्रकाश प्रगटचो चहुँ ओरा ॥
 लखि रविमंडल सूरजदासा । भोजन कीन्ह्यो पूरितआसा ॥
 अचरज सकल संतजन माने । वंदे बार बार सुखसाने ॥
 यहि विधि जबलों रह्यो शरीरा । तबलों नेम निबाह्यो धीरा ॥
 दोहा—ऐसे सूरजदास के, चरित विचित्र अनेक ।

कौन भांति वर्णन करौं, दयो दई मुखएक ॥ १ ॥
 इति श्रीरामरसिकावल्यांक्तमालकलियुगखंडे पंचविंशोऽध्यायः २५ ॥

अथ रंगदासकी कथा ॥

दोहा—रंगदास इतिहास अब, श्रोता सुनहु सुजान ।

वाणिक जात के सो रहे, ज्ञान विज्ञान अयान ॥ १ ॥

एक समय गमने इक ग्रामा । व्यापारी देख्यो इक ठामा ॥
बैठि गोनि धृतमोतिन माला । तेहि ठिग इक यमदूत कराला ॥
रंगदास चीन्ह्यो तेहि देखी । यह चाकर है मोर विशेखी ॥
पूछ्यो ताते तुम कहँ आये । सो कह अवहीं देत बताये ॥
बैलसींग सो गयो समाई । बैल हन्यो व्यापारी धाई ॥
पुनि यमदूत कह्यो असि वानी । धन जोर्यो यह भयो न दानी ॥
तुमहँ करौ न पर उपकारा । होई यही हेवाल तुम्हारा ॥
तबते रंगदास भय मानी । संपति त्यागि भये विज्ञानी ॥
एक समय तिनके सुत काहीं । लाग्यो प्रेत तज्यो तेहिं नाहीं ॥
रंगदास इक समय कुमारा । अपने संग निशा महँ पारा ॥
तेहि दिन मारन प्रेत सिधार्यो । रंगदासको लखिहिय हार्यो ॥
साधु दरश महिमा प्रगटानी । मांग्यो मुक्तिसो मानि गलानी ॥

दोहा—तेहि तनु निज पद जलछिरकि, कानन नाम सुनाय ।

तार्यो तार्हि तुरंत हीं, रंगदासहरषाय ॥ २ ॥

इति श्रीरामरसिकावल्योक्तलियुगखंडे उत्तरार्द्धे षड्विंशोऽध्यायः ॥ ६ ॥

अथ षोडशभक्तकी कथा ॥

दोहा—षोडश भक्त चरित्र मैं, वरणों सहित अनंद ॥

जाहि सुनत श्रद्धा सहित, होत सुमति मतिमंद ॥ १ ॥

पुरुषादासजी, पृथुदास, श्रीपद्मनाभ, गोपालदास, टेकदास,
टीलादास, गदाधर, देवादास, कल्याणदास, गंगादास, अरु
उनकेखी, विष्णुदास, कान्हरदास, रंगदास, चन्दनदास,

तामें प्रमाण नाभाजी की छप्पयको ॥

(पयहारी परसाद ते शिष्य सबै भये पार कर)

षोडश भक्त अनन्य उपासी । पयहारीके शिष्य सुपासी ॥
 एक समय बदरीवन काहीं । गये सकल संतन सँग माहीं ॥
 करि दर्शन लौटे सब संता । मारग श्रमिंत भये अत्यंतता ॥
 रहे एक पुर ताके नेरे । इक बट वृक्ष न तहँ बहुतेरे ॥
 बट तर निकट कूप इक रहेऊ । तेहि निवासहित संतन चहेऊ ॥
 तेहि बट महँ सो रहसै प्रेता । राति वसै निज नारि समेता ॥
 तेहि बट तरु तर रज अधिकाई । आधी निशि आँधी अति आई ॥
 परी संत रज बट तरु माहीं । प्रेतन तनु गै छाड़ तहाँहीं ॥
 साधु चरण रज प्रगट प्रभाऊ । प्रेतनको भो शुद्ध स्वभाऊ ॥
 षोडशशत जे प्रेत महाना । चढ़ि विमान किय हरिपुर जाना ॥
 विन श्रद्धा सत पद रज पाई । प्रेत गये हरि लोक सिधाई ॥
 श्रद्धायुत संतन पद रेनू । धरै ताहि हरिपुर महँ चेनू ॥

दोहा—एक समय पुनि षोडशौ, ते हरिभक्त सुजान ॥

संभर के मेला गये, भइ तहँ भीर महान ॥ २ ॥

परी नदी इक गहिरी धारै । लैपैसा केवटहु उतारै ॥
 नाव चढ़े षोडश हरिदासा । औरहु मनुज पारकी आसा ॥
 मध्य धार नौका जब आई । अति गंभीर नीर भैदाई ॥
 केवट पैसा यांचन कीने । षोडश भक्त रहे धन हीने ॥
 जब पैसा केवट नहि पायो । तब कोपित अस वचन सुनायो ॥
 मैलौटाय नाव अब जैहौ । तुम को अब नहि पार करैहौ ॥
 संत कह्यो लोटत श्रम होई । इतहीं उथल लही सब कोई ॥
 अस कहि सोरहौ संत उदारा । कूदि परे तहँ मध्य दहारा ॥
 तेहि थल प्रगट भयो बड़ रेता । केवट सब ह्वैगये अचेता ॥